

249  
4  
53

槐南集

三



槐南集

249

53



槐南集卷二十二

東京 森大來 公泰

癸卯

元旦醉後放言用溫八叉漢宮迎春詞韻

自我飛入三山煙春旭四十一度鮮非有義和運諸掌  
何人鞭作玻璃響娑婆世界海四環塵氣罩人若羅網  
星月于夜爭光芒上天無奈龍轡長扶桑若木撐不住  
一輪出海無昏黃照見雨花大歡喜佛盃吹將法螺起  
阿耨三藐三菩提詩天早攝毫光裏

啜茗雅集席上和小林天龍慶新年詩韻



白石瓶梅乍一新入春十日始逢春鬪茶說餅奚妨澹  
對酒當歌未覺貧雪意空濛灞橋客冰肌綽約藐姑神  
撥絃好效雛鶯調遮莫梁間起舊塵

檀欒第十一集限用東坡聚星堂雪詩韻時欲雪  
未雪因作待雪辭卽以促之

晚鴉亂如辭樹葉還疑蹴散遙空雪今夜酒力須倍加  
明朝詩思定清絕入春以來天亦寒引領而望心久折  
漸看同雲黯澹封倒惜疏霰依稀滅黃昏竹外纖雨來  
丁東檐間驟馬掣漁翁笑拂釣蓑塵老農喜卜鐙花纈  
豈知化工慳戲伎不遣九天霏唾屑曼陀欲散旋彌空

優曇未現倏如瞥法界華嚴知幾時仙人頃刻復何說  
安得翦水一一飄快刀鑄就鬼國鐵

又分韻得庚

謝簾吟到雪三更偏覺春風著手成儻待來朝紅日出  
玉梅花上怕羞明

雪日土居香國見過有詩卽以此答之

天地三年成一葉吟遲孤負草堂雪白戰辟易降旛飄  
蒼頭瑟縮響帚絕叩門忽報驢背來供客何妨鐺腳折  
急倒屣屣坎窪生笑揮衫笠寸痕滅興隨缸面蟻醪酣  
詩似江心龍笛掣珊瑚拂落舊釣竿燕脂點就新采纈



消寒頓忘獸鑪灰開窗猶擊羊皮屑君歸休怪轄未投  
我醉欲眠眼逾瞥兩人對酌有成例十石能留竟虛說  
頽然僵臥學袁安萬牛難動黃河鐵

越日復大雪讀諸子疊韻之什感而有作

粵稽古者唐中葉韓愈作詩卯年雪後千餘載硬語盤  
吾二三子天才絕奇見翻風豫章動險疑觸柱崆峒折  
團來貌虎直破碎斫斷蛟鼉倏冥滅豈無造化私嫉憎  
故遣陰機恣揮掣坳坳無迹俄平鋪罅隙不通猶點纈  
推戶旋驚凍已膠仰空但視窺爲屑七賢過關何處尋  
雙鬢劃壁有誰瞥紛紜旋轉無暫休慘澹經營未肯說

呵毫自笑用功難關山老嫗磨杵鐵

種竹數疊予已避席惟其中有一篇特見贈示者  
不可不酬也日前問種竹病壁挂元僧笑隱和虞  
道園絕句真蹟尤所垂涎故篇末及之

瑜伽寫罷貝多葉風鏹煮茗若鳴雪維摩方丈病何多  
金粟丹青癡欲絕同好入林臂一把沈思學道肱三折  
正始遺風將欲追中興閒氣安可滅鞭笞鸞鳳教追陪  
搗呵獅象就牽掣草玄奇才未白頭看朱俗眼成碧纈  
世上小兒何賸賸天際真人豈屑屑獨於翰墨存篤嗜  
忍共雲煙委輕瞥蒲室真蹟珍無雙邵庵師法妙難說



令我下拜如雁門老僧看雨金點鐵

二月十三日天又微雪旋屬晴適種竹送到其十  
五疊韻而裳川更有促和之作予請爲兩家解圍  
盤龍蒼壁傾銅葉啜茶曉賞竹籬雪險句冥搜旗鼓當  
旁人大笑冠纓絕不如鼎候蟹眼回坐聽車繞羊腸折  
談天舌本潤腴生澆磈胸膺茅塞滅任君霞佩頡頏翔  
斂我薑芽左右掣已拚古井心不波肯爲唐花眼空纈  
午敕中廚炊藥糜晚注熏鑪試沈屑詩禪三昧不爭多  
泡漚一理難爲瞥輪贏而外基任耽聖賢以上酒休說  
徑須息戰銷甲兵謾向沙中覓沈鐵

種竹寄似二十疊韻屬予更下一斷語卽以此代  
總評云

蓮有苦心匏苦葉苦吟無似今茲雪蒼頡鳥迹搜將窮  
宣尼韋編撫已絕翻覺兵多益能辨誰言末大宜防折  
非非非想非非空法法法生法法滅三才萬象獨端倪  
六轡雙手徐擊掣黑白須教拘翼治清虛正散蒼荀纈  
絕世聰明關夙分尋常文字等麤屑休誇學士衣袖點  
未數道人郊邑暫擅場仲文讓爾譽嘔心長吉從人說  
笑余見獵喜弗禁破慵猶鍛嵇康鐵

啜茗雅集席上次韻



名園折簡會羣豪豈有英雄尙臥蒿冰雪聰明如此淨  
色香風味一般高酒將全力猶搏兔詩鼓奇思欲起濤  
脫手彈丸何捷絕漢家詞賦重枚臯

玉池一半兒集席上分韻得歌

較覺冰梅蕊蕊多鄭康成婢慧聰過不煩哦句巡檐索  
笑近花來一口呵

檀欒十二集次冷灰韻戲作

念念功名念念灰偏尋狂興酒邊來橫吹鐵笛道人鐵  
斜畫梅花和尚梅翠袖殷勤欲相倚銀屏宛轉爲誰開  
風情未必同枯木無數春姿著手回

席上傷吳擊甫

萬里珠沈海月愁屋梁顏色亦難留可憐皖口梅花路  
雪積如山是首丘

大森村本間氏邸園看梅花席上分韻得冬

花宮澹罩白雲重一半春陰一半濃身在中央香世界  
上方雪海下方鐘

將赴出雲石埭置酒見餞卽賦此志別

一鞭西指馬蹄輕將趁山陰雪後程春水綠波乘興去  
扁舟阜帽看花行分攜滑滑乳鶯囀信宿萋萋芳草生  
多謝詩龜今雨靜階除置酒故人情



禾原招同檀欒諸友分韻得支時余將出游啓行  
在卽賦此兼訂花時重集之約

晴雪梅花照路岐一灣流水渺相思歸來春甸青如黛  
聯轡鶯啼草長時

擬王建宮詞

平安山色碧逶迤虎踞龍蟠拱玉墀萬歲千秋大嘗日  
冕旒會引舊宮儀

日月華門羽仗排紫宸傳點召三槐黼帷只在雲霄上  
袍笏雍容十八階

禊事清涼殿上修雲箋葉葉竹悠悠自緣觴詠邀宸賞

花亦流紅出御溝

藤壺漏響接弘徽花影如人拂戶幃夜殿春寒月微白  
不知誰賜錦袍歸

涓流初碧柳微黃早有嬌鶯喚禁牆清曉下簾常御殿  
更衣戶外靜熏香

二條城

氣燄熏天敞畫堂當時金碧尙輝煌可憐壯麗蕭何第  
并作離宮入未央

飄零大樹欲栖鴉祇有城濠繞郭斜公主桂宮移翠館  
女牆時見沁園花

城址今移置  
桂宮舊第



福原周峰香草吟廬始晤神田香巖分韻得真

千里鶯聲一等春洛陽耆舊笑相親依然杯底三人影

二十年前明月身

談次及先君子二十年前之游故云

小憩岡山後樂園有馴鶴數隻故作盤勢來索人

投餌感而作此

後樂侯門著意裁一花一石一亭臺可憐今日園中鶴

卻學歌姬乞食來

院莊

野殿鶯啼古院莊是非何用問三郎我來春雨如絲細  
不見櫻花也斷腸

孤忠慟哭痛蒙塵獨怪詞章擬失倫范蠡不隨句踐老  
白櫻花下復何人

久世晚眺

合沓層雲晚乍晴羣山萬壑碧縱橫下方遙認垂虹影  
樹裏斜陽水上明

美甘道中

一谿纔轉萬峰回信覺山陰人勝來亭午鶯啼天破寂  
人家巖腹有梅開

宿根雨是手島海雪故里因賦一絕以寄

淑靈文藻想孱顏峽迫崖圍翠四環爲是故人留故宅



似曾相識此青山

過四十曲嶺

鳥道攀登積雪殘  
峭風撲面黑貂寒  
陰厓鐵鎖三千尺  
青壁雲梯四十盤  
巴蜀猿愁過峽險  
太行馬覺服箱難  
誰攜謝眺驚人句  
杖撥煙霞絕頂看

松江皆美館卽目

有緣濟勝涉神區  
誰爲詩人乞鑑湖  
帶雨潮頭連海廣  
隨帆日脚入雲孤  
煙嵐匝市青垣國  
松翠霏微碧玉壺  
縱不秋風鱸膾節  
飽餐蝦菜飯雕胡

村上琴屋

壽夫

招飲臨水亭同橫山耐雪

大藏

三島睡

雨榮賦

綠鬢侑酒醉淋漓  
索我松江本事詩  
山腹割來青翡翠  
湖心飛去白鸕鷀  
碧雲蔥樹參差見  
錦石清流激澗移  
鄉與溫柔兩堪樂  
可能一舸逐鴟夷

臨水亭醉中贈觴歌妓

唱出雲州新竹枝  
略知紅豆有相思  
絃聲遙送天涯雨  
一種銷魂是隱岐

妓隱  
妓人

又戲琴屋

玉壺留賞蕩詩魂  
肯與求凰一例論  
檐雨鳴琴春滿屋  
文君今夜欲私奔

妓名  
奔太



簸川懷古

偶然天作結絲蘿聞說雙栖簸水阿開國英靈傷降謫  
拔山雄志恥蹉跎洪流汨汨蚌蛇出真宰茫茫鬼魅多  
賴此崇巖幽岫裏暮年且遣八雲歌

杵築道中

青山作屋可藏嬌未覺鴻濛世代遙滿眼宇迦春黛綠  
一雙人影八雲橋

望大社作

蒼籬海屋渺無涯故國周遭山影斜五夜星明齋火殿  
一聲琴板起神鴉

千家宮司

符紀

招飲伊奈佐濱養神館伊奈佐濱郎

紀所謂五十狹田之小汀也是日雨甚醉後走筆

題壁

折衝尊俎經津主開闢洪荒少彥名咫尺山林窅冥極  
白風惡浪拍天生

恭謁大社

風雲草昧仗神功指顧峇嶷山勢雄鼇海通津常世國  
菟裘遜位日隅宮銀牀露井春泉碧銅馬霜蹄汗血紅  
猛氣猶思波蹴踏挽將天漢盡朝東

神垣松柏肅清高稽首陞階薦澗毛九柱雲雷生寶殿



四絃龍虎躍檀槽蒼崖竹裂高麗笛白日霜飛太閤刀  
觀祭樓頭更瞻仰天妃環佩欲翔翹

松崎水亭定創翦淞吟社會者天游知事琴屋郡

長而外信太淞北英橫山耐雪中島秋圃隨西川

潛齋自者渡部桃蹊寬井川收軒列三島睡雨皆本

地詩人也用琴屋見贈韻卽賦

一碧瑠璃汗漫間喜隨俊侶見孱顏八重神霧網縈氣

十二巫雲窈窕鬢樓閣平臨蔚藍水船舷暝憂倒螺山

便須填到漁歌子琴屋鷺白桃紅正滿灣

又分韻得東是日朗晴始望見大仙山

大仙山色蘊穹窿積雪鴻濛萬古同縹緲湖光明匹練  
蜿蜒橋影偃長虹踏春步履尋幽綠吹笛梅花入破紅  
李鏡陳屏那須數羣鷗相喚送詩篷

曉發松江到境港再次琴屋韻別翦淞諸子

鱗枝柔劃水天間怕被春潮照酒顏七日重來印鴻爪

一鏡兩度見鴉鬢桃花雨發青蓮權霞綺晴分白紵山

多謝松江舊鷗鷺并刀翦贈碧湖灣

山本鴻堂招同山田永年神田香巖大竹蔣徑及

越前人高島丹山沂游嵐峽卽景口號

同舟興比羨陂多倒影嵐山翠錯磨牽紉數條緣絕壁



搖篙一笑越盤渦鶯聲寂歷花相語  
岫意空濛雨乍過  
咫尺也知魚出聽平安仙侶鼓鼗歌

憩三間屋適蔣徑誦示湖山如意兩老唱和詩即

次其韻

百疇提壺鳥三間賣酒家六人一青眼雪白隔橋花

又次永年見贈詩韻

午醉青嵐翠峽間谿流擬洗酒人顏  
不雲不雨花如夢  
澹沱春陰澹蕩山

周峰香草吟廬邂逅矢土錦山次見似原韻

主客吟壇關草萊而今重舉廿年杯  
依然白雪從君唱

肯擬黃金酌彼罍飽看山陰巖壑秀  
偶逢洛下杏櫻開  
何當提挈龍門上乘得桃花錦浪來

服部蘇天又招飲及第堂同周峰錦山赴之率次

主人原韻

鴨頭初綠濫春觴戒後風懷奚足妨  
擬與佳人同拾翠  
儘隨倦蝶去尋芳青袍滿袖鶯花氣  
彩筆干霄雲錦章  
縱是東山大文字讓君萬丈放光長

又次櫻井桂村原韻

旖旎風光久夢思況君醉態老嶽崎  
吟牀酒戶誰能別  
燕嬾鶯酣不自知百事何當如意日  
三春恰是可憐時



看花便好圍紅袖卻怕沈吟白了髭

古曆重三高津小集予阻風中酒終致爽約次清

原颺山種詩韻以志我負罪寔多云

羣賢觴詠恨無緣蝶怨鶻愁上巳天楊柳方眠靈殿雨  
桃花已閉武陵煙茂林修竹蘭亭帖曉夢春心錦瑟絃  
追憶從頭呼負負那堪寫寄薛濤箋

又次磯野秋渚惟秋韻

悵望炊煙古帝壇雨聲寒食倍多酸決然歸去緣鶻促  
儻使相逢怕酒闌徂水難回萍約誤故人幸補筍廚歡

謂本田  
種竹

試攀淀口依依柳替我言愁可萬端

四月三日雙芝仙館翦燭集席上和夢山三絕句

原韻

歸權湘江一翦波春風京國扇微和早櫻花下玉壺酒  
濃比明湖眉黛多

雨聲到處翦鐙聽花氣惺忪睡倚櫺門外天涯多酒友  
便知飲者不須醒

擬寫扁舟畫裏詩春流碧玉森相思嵐山花比東華早  
一種冥濛欲雨時

席上次裳川韻

么櫻煙筍接清筵卻悔宦游非少年雨色須看芳草上



春愁多在綠腰前騷人紛蕙香爲主酒客銜杯濁亦賢  
慙愧江淹夢醒後曾無才思涌源泉

一半兒集卽景偶占

碧廊幽屨響蕭蕭省識莓苔色漸饒穿竹水聲無暫歇  
倚牆花影未全飄及時行樂休孤負約伴尋詩不寂寥  
一任春風隨客去

種竹海雪皆不在

青山紅粉共迢遙

檀欒十三集墨江舟中卽興用冷灰原韻

是誰眞賞好韶華夾岸樓臺一簇霞卷起簾櫳齊目送  
詩人畫舫緩看花

照影春漪徹底明蘭橈雙槳盪新晴墨江何似松江上

桃葉桃根送我情

新柳絲絲裊麴塵鴉黃眉黛媚濃春春醅持比鴨頭綠  
醉看水邊多麗人

春水盈盈放櫂遲波紋生縠落花時百年閒是白鷗意  
裘馬王孫知不知

窈窕櫻雲凝不流關關好鳥喚河洲有情一片夕陽水  
穩送吹簫搗鼓舟

又分韻得先

樓臺絲管美人天鴻爪山陰未惘然白雪分明花匿市  
碧雲依約月留連笑將金錯煩纖手醉把芙蓉擬大仙



那得并州刀再翦淞煙淞雨現君前

湖心亭餞高野竹隱之黃薇時予方自山陰返知君往程是我過來路也率次留別原韻志別

徑欲隨君覓夢行謝家芳草滿前程年時鐙影醪醺動  
昨日花梢豆蔻成暮黛西都山薄媚春帆中國雨多情  
歸裝未卸還分手愁自湖心水意生

又送土居香國赴任金澤仍用前韻

朝辭輦轂背春行迢遞關河北陸程官屈奇才雌暫伏  
天教麗句玉同成石川金澤鏗鏘響鶯驛花郵婉婉情  
休較雞蟲閒得失擲觴一笑暮雲生

唾壺

唾壺敲缺劍摩挲天下英雄奈爾何狗盜雞鳴須有用  
聯衡合縱不勝多魯連高節眞排難葛亮孤忠獨貴和  
爲念杜陵詩百徧致君堯舜志難磨

五月十一日東掖門內迎鑾畢赴永井禾原城西宅口號一首

風雲竝護翠華回紫陌雷霆白日開萬騎龍媒趨輦道  
九天羽仗夾宮槐上林花隱鳴珂散西郭山明拄笏來  
趁約名園峯森爽聖朝一物在深杯

來青閣翦燭集分韻得支兼贈夢山



寸蕉纔展可題詩牆角黃昏叫子規秉燭酒光并灑灑  
逗簾苔影自離離好花已見留春住圓月何妨出樹遲  
徐借餘暉照吟席八年韻事話雙芝

又和禾原原韻

卅年身世費評量未可歸田老插秧松下煮茶禪榻靜  
花陰尋夢蝶牀涼翦將明月呼爲燭膾得鮮鱗斫欲霜  
斗酒開懷同所願任他烏兔去堂堂

竹醉前一日檀欒十四集卽興次冷灰韻

推激風騷聽嘯吟恍疑梵唄入雲深游山肯讓謝靈運  
愛駿未輸支道林晉帖唐臨休取貌白仙甫聖且論心

誦詩一夜忘寥閔修竹相扶醉自今

再和裳川落花

彌空穠雨散深緋金谷芳園指顧違柳絮霑泥同小果  
神仙委蛻見空衣儻推物理應須謝得嫁春風不礙飛  
也勝杜陵江上客轉蓬身世去無歸  
那得柯頭卻再生惜春百轉任羣鶯颺時不借吹噓力  
棄去休關徒倚情馬足風塵甘自賤鴻毛性命有時輕  
男兒飄泊還私愧落地無聞些子聲

惆悵歸來喚奈何舊時門巷忍重過鵲初鶯晚春無迹  
苑外江頭水自波瘞去心紅憑寸草悲來頭白代長歌



觀空倒悟詩家妙不在穠鮮麗縵多

花後松浦鸞洲世子厚招飲蓬萊園卽席次觀梅

唱和詩原韻言謝

湖光坐領鬢波澄不趁輕肥向五陵樓上納巒當畫障  
檻邊控鶴作詩朋綠陰幽草佳期得白雪紅梅俊賞曾  
太勝蘭舟棠棣子玉簫金管醉銀鐙

彌天春水積爲雄醉掣鯨魚碧海同彩翠樓臺互明滅  
蓬萊花卉倏青紅擬從閩苑齊驂鶴誰向扶桑笑挂弓  
恍作飛鸞洲上想濤連五島亂松中

鈴木鹿山宗文招飲名古屋諸名士于香雪軒余亦

與焉賦此言謝

城闕金鱗映日紅吾鄉人物氣熊熊織豐兵騎鷹揚奮  
紀水藩封鼎峙雄亂世乾坤曾一賭中興豪俊未全空  
笑趨珂里衣冠會酒國憑君并勸功

風日有感晚赴玉池晤丁叔雅惠康初山衣州逸也卽

作此歌

孟婆作惡終日橫熏絃不調心恹恹民財未阜愠未解  
坐使炎官專秉柄浮雲蒼狗徒變移白馬清流自爭競  
塵沙眩目天昏黃難辨鳳鸞與梟獍似聞構廈今方牢  
誰肯薦賢陛下聖朝無闕事野無遺愼勿輕言怕機穽



不如來醉玉池龜招要酒徒會劇孟婆娑園柳變鳴禽  
參差水竹交三徑海角歸人荷作衣坐中仙客鶴同姓  
愧我塵中牛馬走主人襟胸皎如鏡酒闌風歇心頓涼  
笑看星月光掩映

來青閣齋集席上分韻得湖

慨當以慷倒百壺朔天寥廓星張弧休云途遠日將暮  
且免志大終成迂諸公袞袞將進酒時事咄咄鼓嚙胡  
九州正求豪俊急渴極夢欲吞江湖

來青閣再晤叔雅卽次玉池席上原韻賦呈

褰裳飛渡路非難況此仙山秀可餐海角飛霞紉佩送

雲中織女駐車看蓬萊水淺圍新綠芍藥花開有暮寒  
兩次相逢文字飲敦槃且喜禮從寬

櫻雲臺觴陶集林

森甲

方葯雨

若

賦贈

震且賓朋此盍簪浩歌激烈痛難禁蠶蠅塞近眈眈逼  
鞅鞅天霾噎噎陰兩界保障烽埃斷百年甌脫火車侵  
誰防起陸龍蛇勢縱目高臺置酒臨

席上用集林籌字韻卽賦

扶桑弱水急邊籌不獨黃河是濁流杼軸紛紜非久計  
鯨鯢唐突切同仇三年宗慤酬雄志八極盧敖豈浪游  
修劍拄頤歌擊缶浮雲無際莽悠悠



六月初六皆香園茗集率賦

勅勒牛羊白草低是誰橫槊有詩題雕盤顯頊玄冥北  
虎視崑崙月窟西將相功何須附鳳神仙心自可通犀  
王喬丁令歡攜手九點齊煙靜戍聲

檀欒十五集次冷灰韻

重重樹影靜移闌撫到焦桐罷手難真趣須於絃外領  
好書儘向腹中攤瓦鐺淪茗泉堪品竹院聞鶯藥可丸  
更摘櫻桃供小飲綠陰還恐食簞寒

席上分韻得江

欲罵人間詩句惹吾心但藉酒杯降掉頭一醉淋漓極

鐵板銅琶唱大江

雙芝仙館翦燭集和夢山原韻

頓悟無多漸亦稀詩情畫理竝禪機千章夏木四圍綠  
一鳥不鳴花不飛

江南好景雨中題聽盡禽啼滑滑泥只願年年此時節  
有田二頃把鋤犁

短短牽牛蔓漸斜空池吠蛤亦無譁要語聽雨閒滋味  
靜共鄰僧一榻茶

安得煙波一櫂移酒船拍拍唱歌遲蕨芽竹筍雕胡飯  
和徧涪翁觀化詩



席上分韻得冬瓶內紗羅樹偶墮一花乃作

雨簾幽事晚逾濃茶鼎颼颼風入松怪底紗羅花小墮  
隔林精舍一聲鐘

送高島北海得三以繪事游米國

覆載之內無非畫日月山川人鬼怪真宰意匠經營工  
一一憑空畫世界循環瀕洞無始終滄海漫限球西東  
但看蒼蒼莽莽極萬象一幅橫披中北海丹青蓋罕匹  
雲煙不數荆關筆昨游歐羅今米堅鯨噓電掃天吳恍  
五洲萬嶽隨手驅便是君家活畫圖吾因騁臆胡爲乎  
世界正須吳道子地獄變相無時無嗟吁地獄變相無

時無

玉池翦燭集分韻得虞戲效放言

槐陰醉煞老淳于觸熱功名夢也無獨羨竹中涼一味  
碧廊幽處聘青奴

又和夢山原韻

麥雨梅風取次移夏天澹覺夕陽宜水蕙花白魚苗長  
閒看蜻蜓立釣絲  
麝煤鼠尾妙香添展盡文茵卷盡簾暮月一池眉子硯  
影蛾描到兩頭纖

又和一東石如順醉後二絕句韻



漢家久困白登圍將看饑鷹飽肉飛任是陳平六奇計  
可能談笑轉危機

自負堂堂七尺軀時艱蒿日枉嗟吁悲歌斫地無人識  
驚起畢逋城上烏

玉池一半兒集率賦一律

笑赴襟期會此筵出門歌鼓正喧闐青谿白石神絃曲  
翠幃朱城美女篇雨霽梅天無小暑鼎鳴槐火有微煙  
略知人境饒幽事不用山林謝世緣

臨江樓齋集卽賦呈清國諸賓

東勝南瞻一氣賒乍看若木挂仙槎日臨太甲雲中蓋

棗剖安期海上瓜文字小因從有漏人天大會本無遮  
應須同此霓裳詠聯作蓬山赤縣霞

酒間又得一首

微言或恐墜軒羲痛極高歌莫諱悲龍象何當真蹴踏  
豕蛇未肯就羈縻秦灰瀕洞連兵甲魯壁淒涼聽竹絲  
不合倒流汶泗水諸君砥柱力扶持

七月四日清谿雨集卽賦道情

槐夏無花但綠苔鑪熏一炷午甌開蜩鳴未沸風微變  
蟻戰方酣雨驟來蕉葉覆隍空得鹿碑文薦福又轟雷  
勞生何似茶澆腹炊黍中間喚夢回



玉池一半兒集分韻得先

逢場游戲可隨緣拍拍同浮鴨背船要學江南魚樣子  
相從淺葉藕花邊

檀欒第十六集次冷灰韻是日移帝室制度調查  
局于樞府一隅卽兼似高島九峰

移曹鎮日澆炎埃晚趁幽期襟乍開盆石欲浮苔翠活  
簾風剛灑竹聲來盛唐省掖多詩老北宋朝臣是黨魁  
壇坵歐蘇公等在寸心偏折宛陵梅

席上分韻得虞

天邊玉女笑投壺倏使炎氛掃地無疑是閩風層上坐

招涼明月大於珠

劉蔥石

世所

有金石圖說之刻玉池相見贈以長句

金石圖成一浩歌糶糊缺月自摩挲德衰久沒歌雲鼎  
憤極誰揮駐日戈岫嶼殘碑蝕科斗岐陽斷鼓斫蛟鼉  
酒酣還展犁眉集竹帛功名更若何

席上次長岡雲海韻卽贈石球

竹菴無餘地龜幽有別寰水憐花影小草惜蝶魂孱佛  
儻此間住情應吾輩關素桃蠻柳裏位置白香山

雙芝仙館翦燭集席上雜句

冷淘槐葉一甌清坐對階泉瀉玉輕更憶翠瓜兼碧李



引涼以外欲忘情

無心鷗已似吾生知了蟬惟三兩聲卻羨烏牛浮鼻樂  
扁舟長嘯一含情

遣此工夫懷抱開相逢覆盡掌中杯老來仍著潛夫論  
不信冥心若死灰

月殿雲梯步步難那如粗糲腐儒餐前程夷險君休問  
一簣功同百尺竿 右和夢山原韻

林泉別占一區寰不在江湖不在山笑看城中人避暑  
紛紛能得幾多閒 分韻得閒

啜茗雅集席上次禾原韻

強扶醉態怕難支猶似夏雲頽亦奇新夢將尋銀漢水  
舊題已忘碧紗詩木芙蓉啓知秋意玉鏡臺臨見月姿  
聞說中元容易過好期海客汎槎時

玉池一半兒集分韻得東

芙蓉墜粉月中紅蟋蟀新聲露底工潘恨宋悲吾不解  
一年稱意是秋風

席上戲用冷灰所得韻

煮茶庭樹生微颺哦詩屋壁蟲鳴秋玉池一舫客三五  
星與鐙火光幽幽窗間金石羅鼎爵拓本有似蛟螭膠  
酒醞魚鮮海味足中廚食譜不外求軒轅竦肩來入坐



苦吟笑煞劉與侯主人正喜看哺啜不吐隻句何須憂

中秋前一夕來青閣翦燭集雜句和禾原原韻

月來蓊蓊自生煙松石藤蘿三徑前想見明宵金粟影  
妙香亦覺鼻觀圓

感係人琴已隔年當時留照是奇緣中庭依舊芭蕉樹

秋冷維摩小影邊客秋與樂甫小宋  
拍照園中故及

倚柱沈吟任苦思九分明月溢瑤卮且須痛暢開懷飲  
來夕詩成也未遲

又和夢山原韻

風月雙清映碧紗車聲猶送市朝譁結廬何處非人境

吾愛東籬隱逸花戲安  
川也

強鄰怪事足然犀三省秋風颯已淒聞道金縉輸欲盡

關山猶未撤兵聲紀時  
事也

又分韻得寒卽次裳川原韻

清輝能幾眼中看夜夜支頤倚盡闌稍喜襲人叢桂發  
乍驚如雨亂蜚寒不多明月從雲漏無限清愁把酒寬  
陰翳宛然秋士意只親藥裹與詩丸

古中秋湖心亭檀欒第十七集分韻得青

四海八荒同一照流輝直欲滴瓏玲便知皓魄隨人意  
誰把圓規鑑物形風急哀鴻絕霄漢霜寒壯士惜精靈



金戈鐵馬天山北那耐邊愁笛裏聽

又得絕句一首

論詩幾度醉湖亭賦到中秋筆暫停無數青荷持作鏡  
月明不合獨空靈戲裳川也

雙芝仙館翦燭集席上作

詩成三徑菊香通休使坡公豪興空風雨滿城泥滑滑  
黃樓明日酒杯中

佳節相迎覓句忙九秋餞到菊花香也知晴重人間晚  
酩酊堪酬是夕陽右和夢山原韻

初八香生重九葩五風十雨滿陶家未知何日人心別

先別金釭照菊花

分韻得麻

又次禾原見似韻

重陽前夜雨蕭蕭已覺重陽秋色饒流水徂應等今日  
菊花香不待來朝歸休未羨陶籬醉招隱偏叨蔣徑邀  
肯讓登高大夫賦雙芝翦燭會賓僚

豕原夢舟

周

寒翠莊雅集分韻得東卽景道情

幽處真從曲徑通清潭百頃皺微風松間苔厚封盤石  
谷口霜明看晚楓河嶽英靈詩社外雲山韶濩畫圖中  
正聲繫此林亭會不與尋常唱和同

古重陽檀欒集用去年與吳學甫賡和詩原韻以



志怙悵

一片征帆萬里程當時驪唱醉中成寧期對酒今無語  
虛擬因風屢寄聲楓落江寒秋可怨蘭衰菊秀日關情  
愁予目斷蓬壺外何處詩人鬱鬱城

又賦二絕句

每值重陽喚奈何前賢好句不勝多淵明獨對黃花笑  
萬古人間我與他

和冷灰原韻

楚賦招魂酌酒催夜臺紆鬱也應開熏香俊煞柴桑像  
徐淑秦嘉薦菊來

和欣欣女史原韻

雙芝仙館餞秋雅集席上雜詩

霜林錦樹織秋機況有野田黃雀肥煖酒不須敲石火  
滿肩紅葉醉樵歸

觀楓半日餞秋遲卻被鐘聲聖得知一杵催過牆外寺  
與僧清話拂松枝

初寒碧瓦有微霜返照一株銀杏黃爭奈徂秋留不得  
菊花瘦似沈東陽

右和夢山原韻

槭槭蕭蕭聽雨聲深愁丹翠看難明不知天意隨人願  
晚爲霜楓故放晴

口占一絕

惜秋菊露任餘潛背日楓霜亦已殷橘綠橙黃從此始  
人間吟事未應閒

分韻得閒



丹楓飽看雨霜時賴是今年搖落遲天以夕陽相祖餞  
秋人一醉可無詩 和禾原韻

頭風陳檄看須痊此事終關文字禪自是君詩成太速  
苦爭一著祖生鞭 答袁川

湖心亭檀欒潑散會效種竹豔體即用冷灰原韻  
祇應水國是情天一笑張燈曲檻邊門上烏藏霜柏冷  
湖心月皎玉壺圓歌邀桃葉聲聲慢漏滴蓮花刻刻遷  
卻忘鴛鴦頭半白欲俱野鴨宿終年

又分韻得時字口占并似海雪  
購得生書慰所思手難釋卷讀逾奇何惟三尺刀新買

劇似摩挲十五時

至日遣興 蘇燭集  
席上作

自從餞秋徂歲月忽其暮百卉率已凋淒颯掃寒樹豈  
無蘭芷芳總為嚴霜故欲保松柏堅斯人洵希遇爰以  
南至辰偏獲展良晤天地生微陽林壑申寸素出處非  
不殊俯仰同所慕緬懷千載心各慙一觴趣誰登候氣  
臺雲物莽回互獵狃猶殺機朔陰失和煦為問周圍丘  
雷鼓儻憑怒吾儕雖寡營敢忘當世務屏撥莫復言萬  
象付冥悟

翦燭集醉中雜和



霜天冰月照闌干詩是陽春欲和難卻羨牡丹花出窰  
曾無知道外邊寒  
瓶有牡丹花一  
朵鮮紅可愛

美景良辰恨易徂偶然興到即天途一枝濃豔衝寒發  
也似芭蕉雪裏圖

江樹垂垂欲發多催詩誰是水曹何尊前坐對被花惱  
一笑吾將擬涪皤

典盡鸛鷓寒更加世間無似酒堪賒興來枉乞燕脂筆  
亂點橫斜第一花

槐南集卷二十二

槐南集卷二十三

東京 森大來 公秦

甲辰

早春檀欒例集和冷灰原韻偶賦四律

可意春風聽好音柑香酒醞漬衣襟四圍修竹交黃鳥  
三弄梅花入綠琴暮景飛騰雖已過新年行樂適道今  
老顛飲罷顛如故且慰蒼茫獨立心

洪鐘豈屑寸莛音俗不相容傷抱襟衆謗將盈樂羊篋  
善悲誰解雍門琴英雄末路美人暮明月前身流水今  
總為宿根聰慧誤名垂萬古是初心



天寒空谷忽楚音夢裏幽香襲我襟一鳥不鳴花欲雪  
衆山皆響水如琴舊游想像追猶昨始願蹉跎悔到今  
只合買舟明月瀨樵漁同話結鄰心  
蕭寥遺世感希音落落憑誰展素襟鬢到欲凋妻諫酒  
柱緣易促客停琴獨期此會長如許料識明年健似今  
休較從前誇盛氣濫推同調不知心

出師 并序

出師紀武功之盛也韓子元和聖德詩序云率先作  
歌詩以稱道盛德不可以辭語淺薄不足以自效為  
解余亦猶此意爾柳子獻平淮夷雅表云周宣大小

雅鏗鉤炳耀盪人耳目宣王之形容與其輔佐由今  
望之若神人然是非吾所望矣柳子又曰盜取古書  
文句聊以自娛噫森子其庶幾乎

我師出矣于海之外馬韓辰韓惟一衣帶海水洶洶奔  
鯨有沛厥醜維何維鷺伊旆血人于爪肆為譎猶古之  
烏孫康居奄蔡

既恃荒裔自恢鬼區冰天雪窖旃帳穹廬乃踰絕漠乃  
專朔隅天狼爛爛下垂其胡乃餌乃誘罔彼寡孤蟠踞  
遼瀋莫我敢虞

惟此遼瀋三韓牖戶惟此三韓寔我疆圉遭茲艱脆莫



敢寧處帝念綢繆拳拳尊俎仁雖騶虞奈何緜豨我師  
出矣如旱斯雨

帝戎裝矣萬國望矣開九閭矣宣四方矣招搖鉞矣鉤  
陳蒼矣師騰驤矣兵氣揚矣雷鼓喤矣龍旂央矣金鷄  
翔矣虜魄喪矣

列缺霹靂海立山飛濟物之浦旅順之沂奔輪焱怒咄  
咄譔譔崩濤焦爛如在鼎臚鐵甲齏粉魚龍駭馳斫彼  
凶醜奮我神威

於赫豐原惟日之杲帝猷克壯惟天之保轂驪抗嶽亦  
孔之狡彼狂且昏自取震掉帝援天矛氛祲霆掃會朝

清明仰瞻蒼昊

惟帝惟天皇矣是祐英靈扶輿亦生碩輔風后力牧惟  
肱惟股皤皤元老尹吉山甫雲門鏡吹樂懸鐘簴百僚  
侍祠告功神祖

出師七章章十二句

紀事一首玉池一半兒集席上作

夜營吹角鳳城端耿耿星芒拓戟看遼海掣鯨擒索虜  
天山傳箭走烏桓勢成但覺建瓴易戰捷逾知銷甲難  
凝聚乾坤忠義氣梅花鐵骨鑄春寒

詠梅用陸放翁西郊尋梅韻

樓樂集  
席上作



動人真色素而豔儻施鉛粉便堪厭可憐遺世獨立者  
往往尋常道旁店亂頭粗服相見時使我驟生金屋念  
休言措大窮眼孔宋玉東鄰實未覘卻對西施動唐突  
廣文謾思食肉僭鐵石心腸冰雪膚秀真在骨難爲砭  
如何春風不自持似與笛聲負逋欠空山無人明月來  
翠袖微嬌香剡剡日成便是美人禪也知貴頓不貴漸  
徑須索載萼綠華扁舟擁髻擢春灘

送伊藤大使往韓國

阿羅思國盤長虯尾從勿吉連挹婁黑水白山失甌脫  
兔青鴨綠無鴻溝高麗亭堠暗烽燧日出天子揮神矛

冰海進兵唐絕域星槎奉使漢通侯天門日見捷書報  
韓廷猶似風中蠹聞道其君少晏眠皇情矜切念鄰好  
英謀祕略誰得知公也闕廷屢蒙召時危未許紫芝歌  
契深親拜黃麻詔誕持龍節乘長風樓船捧日波濤紅  
箕邦草木入熙煦交孚威惠回沖融宇宙皆知聖猷遠  
出師本意非興戎非常運會仗魚水方立萬世不拔功  
掃蕩大荒安肅慎雲龍風虎騁豪俊天兵照雪朔漠驚  
疾雷破山金鼓震黃金帳殿亦何有月支頭顱堪血刃  
是時公獨憂黎元身膺稷契致堯舜公之此志曠代希  
公之此行轉禍機遙知敵亦竊心折萬古義戰生光輝



杜陵久效貢公喜遲暮帷幄神空飛滿城梅花夾道雪  
春風作誦過公歸

檀欒集席上限韻詩自亦不知其述何事惟風人  
之旨言之想應無罪爾

封侯夫婿別春閨黯澹眉山翠帳低漏咽疑回隴頭水  
天明怨報汝南雞自非王事誰無淚便是兵丁亦有妻  
爲聽梅花歌子夜早平胡虜不須啼

又分韻得支

屏絕聲聞與辟支梅花香雪韻于詩前身合是王摩詰  
不作禪師作畫師

送三谷耕雲大尉從征露軍

有脚陽春徧海寰知隨笳鼓到邊關萬櫻花發須臾頃  
百戰場開夢寐間戟照扶餘城上月旗摩粟末雪中山  
翦除封豕長蛇盡躍馬看君奪彩還

雙芝仙館翦燭集席上和夢山原韻

丈夫本合事鈐鞞投筆戎軒亦足豪手縛降王吾事畢  
不然日日醉醇醪

無定河邊青海涯而今戰骨未勝薶君看五萬萬軍費  
典到貧閨寒女釵

春愁怕向笛中飛落盡早梅寒襲衣我欲巡檐猶索笑



玉蘭花上月微微

芝館燭集分韻得前卽興賦此

裙展東華塵漫天喜追幽約愜吟聯稠花亂蕊春吹雪  
蝶影蜂聲午散煙調鶴遲回芳草上停琴小佇夕陽前  
詩情收在閒庭院拾翠何須去闌妍

席上和夢山風字韻二絕

飛紅一陣雨聲同花影蕭蕭院落中卻愛綠楊垂跪地  
闌干搭住仗微風  
回廊曲曲窰房慵有斜陽隔樹紅明日綠陰如水長  
羣花落盡鳥呼風

又次石埭夢山唱和原韻因憶墨江花事之盛

墨江宛是曲江春夾道遺鈿瑟瑟塵青鳥紅巾不知數  
麗花笑看水邊人

又和石埭連環體

寶馬香車鬧鳳城千門戲蝶不勝情阿儂怕被櫻花惱  
黃四娘家造次行

踏莎緩緩看花行簇蝶羅裙最有情好句倩誰書匹練  
澄江霞綺謝宣城

五月一日墨江雨集是爲檀欒第二十三集卽用  
冷灰真韻五絕句韻賦成雜句



新蒲細柳接芳辰  
笠屐蕭然看雨人  
趁約野航三兩影  
江鄉來作一家春

覓句沈沈閉好春  
出門烏帽帶紅塵  
不緣風雨驅詩思  
誰信高歌有鬼神

玉壺欣賞可兼旬  
賸有桃花不誤津  
最愛雨零風細極  
帷燈小閣晚留賓

秦宮花底一生春  
酒醒還憐芳草新  
不用聞鐘發深省  
夢紅泣綠總如塵

眉黛欲攢波欲皺  
鱗鱗淥酒正霑脣  
繫春萬種閒愁緒  
付與當筵詠柳人

時裳川以春柳  
三律索和故及

又分韻得支

醉將芍藥謔相貽  
休笑樊川鬢欲絲  
飽看梢頭紅繭栗  
玉山雖老尙支持

和裳川春柳

金縷臨風宛轉歌  
踏青自古細腰多  
落花與掃吳王苑  
去燕曾隨漢水波  
飄絮浮萍小離別  
青驄油壁緩經過  
尤憐眉月朱樓側  
中婦停箏大婦梭

相逢時嬾別時思  
情緒千端不自知  
抱月飄煙如許瘦  
栖鴉流水幾回悲  
絲憐蘇蕙緘餘錦  
臺惜韓翃折後枝  
何似小姑常獨處  
買舟閒繫水邊祠



寒食東風裊麴塵銷魂一曲渭城春  
粼粼橋下朝牽夢  
鬱鬱園中午帶人  
非雨非煙復非霧  
宜嗔宜笑最宜顰  
柔情搭在鞦韆索  
送過銀牆宋玉鄰

雙芝仙館翦燭集和夢山四絕句

醉中聞捷想戎衣  
兵畫邊機總不違  
十斛葡萄須引滿  
鴨頭綠水正春暉

弓衣織句勝籠紗  
笑看倚天長劍斜  
萬里罡風春一掃  
殺人如草血如花

旌旆悠悠點朔風  
孤城三道礮煙紅  
威弧一指天狼斃  
方略都存睿算中

夢鞭鐵馬飲長城  
肯道懸軍萬里情  
若使皇輿恢拓徧  
蓬婆雪外不辭行

席上分韻得蒸

好夢江南不可憑  
五風十雨總難勝  
靡蕪徧地憐玄墓  
杜宇啼花惜馬膾  
屢側烏巾尋酒舫  
偶來綠野翦詩鐙  
餞春彩筆留春在  
我是多愁合讓能

暮春來青閣翦燭集次禾原韻

洞豁明軒了鳥窗  
步廊苔影破微燈  
水綠修禊徧成曲  
蝶爲尋芳本自雙  
詩有別才人語綺  
花消英氣我心降  
沈吟綠掩紅遮裏  
不覺黃昏點小釭



席上觀丹羽花南詩畫卽用其韻志愴

露條煙葉看如新想見當年裊麴塵惆悵酒闌歌散後  
楊枝猶作畫中春

又和夢山連環體

尋常花事已闌殘萬綠陰成尙怯寒貯雪白醅醖院落  
駐春紅芍藥闌干

池塘草色上闌干春水皺時風自寒柳絮一團魚咬去  
櫻桃萬顆鳥銜殘

勝島仙坡博士仙靜園莊雅集席上次韻卽賦

駘蕩風光取次殘絳衣過暖袷衣寒偶追觴詠名流集

休作田園雜興看幽蝶一春尋夢慣穠桃三日祓愁難  
詩成未洗鶯花氣笑對青山窈窕巒

席上分無計延春日可能留少年爲韻得留

園莊靜占好林丘盡日風簾自上鉤爲是晚櫻酣若許  
夕陽紅亦小淹留

又和鸞洲公子原韻

誰道仙源萬古存須臾甲子小乾坤武陵縱閉漁郎路  
還有桃花引入門

來青閣雅集卽景次禾原韻

夏木千草綠蓋天三春餘卉儘爭妍濃陰市屋烏呼雨



明月栖霞人隔煙芍藥誰拈山石句英雄轉喜女郎緣  
傷心更有虞姬草不是重瞳亦黯然

雙芝仙館翦燭集和夢山原韻偶聞德國水師欲  
借洞庭湖習戰前詩故及

休效靈均佗係辭長沙慟哭也應遲洋輪游弋瀟湘水  
卻似江潭競渡時

擬著滄浪漁父衣菱塘柳陌看斜暉清漪徹底香魚長  
頓頓鷗鷺拍榜飛

席上紀感一首

諸將樓船控莽濤不知風雨暗飛艘釜魚竟作鯨鼉勢

紫海冥冥鬼哭高

又分壁幅青山只滿目五字爲韻得只

茗葉松花微籟起移階苔影濃于水詩無渣滓簞無塵  
揮塵許談風月只

紅葉亭卽興次湘南韻

南熏清暑一尊前幽約相邀也勝緣游續江東新蠟屐  
夢馳塞北舊屯田雨濃樹影欲成水午靜琴聲如墮煙  
忽憶調冰兼雪藕葦湖淨淥渺連天

有彈琴者雨簾  
煙樹倍覺幽雅

榎本櫻東久在北海湘南亦新從札  
輓返席上盛談葦菜湖之勝時鄰院

玉池一半兒集邂逅飯冢西湖賦此以贈



歸雲與倦鳥會意偶然深夫君工五字盍寫淵明心詩  
有微妙悟傳以縹緲音儻問第一義空靈何處尋

檀欒二十四集和冷灰原韻

弓挂扶桑杲日枝丈夫本恥閉車帷乾坤偶擲樗蒲局  
和戰誰操傀儡絲黃帝旁支繇拓拔烏孫舊部并昆彌  
天兵早繫名王頸十二金人我所思

席上分韻得真戲調種竹

只能嗜好便殊珍書畫休論贗與真飽喫荔支三百顆  
東坡以外更無人

次韻重調種竹

花鳳何須說海南夢中小蝶亦能語知君酒渴鐙殘候  
如玉佳人笑擘柑

阪本三橋太守囑題先君子三國竹枝詩卷真蹟

後并序

今茲仲夏阪本三橋太守從福井上都過訪草廬出  
示此卷寔係先君子四十年前真蹟斷紙零墨展轉  
易主失去其半太守莅任以來琴堂有暇搜訪之勤  
終能蒐輯全幅首尾完具得了此一段文字因緣可  
深感矣攷先君子北陸之游在慶應丙寅歲杪以臘  
念六日下羽水到三國港淹留彌月文酒縱歡佐以



豪絲哀竹紅粉齊回謂爲神仙中人至丁卯春分節  
去赴加州山代溫泉再抵福井則正值禊辰看桃題  
柳有前度劉郎之概焉前後得詩不下六七百首彙  
爲四集曰千巖萬壑集曰九十九橋集曰港雲樓雨  
集曰桃花流水集三國竹枝辭卽所謂港雲樓雨集  
中物也三橋時方在童巾而余亦在襁褓今則兩人  
鬢毛種種披卷對觀恍若接先君子之容儀而聆其  
警咳余又安得不悲自中來邪敬賦絕句四章以志  
愴懷

竹枝豔體玉橫陳休道詩詞半婦人觀罷公孫大娘舞

張顛草字自通神

載酒扁舟鷗夢中山林江海樂應同分明四十年前事  
長使滌人憶醉翁

雲煙百紙惜飄零禊節桃花幾度經不意風流賢太守  
還懸重價購蘭亭

遺編縱未付蒿萊中落箕裘歎非才卻羨絳紗詩弟子  
于今富貴逼人來

玉池翦燭集分韻得東卽送三橋歸任

玉池佇月玉簾櫳荷暗螢明水竹叢更與歸人永今夕  
翠鬢笑別燭枝紅



永正禪房花木通蓬萊樓閣雨雲中總是先人雪泥地  
使君留意去乘驄

先君在三國時寓永正寺蓬萊樓卽港中第一酒樓

雙芝仙館雅集和夢山原韻

水天賒月價難論散髮滄洲對綠尊一夜風吹舟不繫  
藕花無數笛家門

又兼餞三橋

尊前有箇暗愁存薄夜分箋不近誼院宇深深人欲別  
一雙鐙影解銷魂

又分韻得收

江鄉風味雅宜秋白芡烏蕩取次收便好扁舟搖月去

忘機閣下起沙鷗

又次石埭原韻紀事

涼颿驅酷熱驕敵奈天何樓船摧海甸巷陌唱饒歌白  
日猶飛電銀河亦欲波披襟真快適此夕捷音多

又分韻得爲

豆棚瓜架雨如絲漁洋成句鬼唱秋墳妄聽之主客中元鐙火  
影作圖誰復效張爲

大久保湘南招集雲水庵是爲隨鷗第一集有詩  
卽和

彈指茫茫聚散年墨江書畫賸空船夕陽似閱恆河劫



照到一庵雲水前

茶板粥魚欲遺世  
蔬風筍味可觀空  
舊賢相見新蓮社  
不用攢眉謁遠公

燦燦銀鐙灑灑尊  
不如靜與白鷗言  
詩人從是僧同澹  
夜夜來敲月下門

故人把臂我心降  
笑見滄江白鳥雙  
要繫一竿風月重  
漁家傲是舊詞腔

聞石埭裳川赴輕井澤  
遠近山莊有此寄  
井簡冷灰主人

雨三四點茆檐曙  
起看白雲若飛絮  
令人悵聞雞鳴

二子遠入白雲去  
雞黍趁約作急裝  
北山猿鶴那可忘  
我不相從神獨往  
白雲遠近之山莊  
白雲一霎蒙衆嶺  
故人候客葛洪井  
古木幽篁啼子規  
野花娟娟鮑姑影  
江郎自愛栖碧山  
還念一客塵埃間  
岫巖二子且小住  
儻有我出如雲閒

抵輕井澤途上口號

飛鳥騰身出世埃  
古吾妻野望中  
回數家茅屋縹車響  
一道平川畫障開  
空翠榛山晴窈窕  
窈窕雲霞金洞石  
崔嵬八州盡處天梯  
接直入神仙窟宅來  
一洞纔過聞亂鶯  
再穿一洞暗泉鳴  
峰峰盡向飛輪抱



洞洞還朝絕頂行直下透遲哀壑邃當頭滂渤白雲生  
笑看小蟻來旋磨上界羣真拍手迎

遠近山莊傲諸君青字韻詩

洞穴通霄出杳冥別天還關小林垌有時風雨千峰黑  
不斷山煙一道青芝草琅玕圍宅長石蘿泉水作琴聽  
鹿車仙眷來偕隱自在吟人杖履經

登最高峰再用青韻

欲凌絕頂謁眞靈獨自攀蘿隨意停乳竇細泉珠滴瀝  
秋花纖徑蝶伶俜脚跟積氣彌雲海杖底奇峰矗石屏  
縱目長風神一竦瑤壇吹撼碧霄鈴

偕石埭詣善光寺作

殿閣高臨八郡天相攜隨喜俯前川龍蛇平陸蜿蜒起  
獅象虛空縹緲懸碧水碧山清供養信男信女善因緣  
且憑像教無邊力早度刀兵慘澹年

遼陽行

遼陽天險敵所恃東南峭嶒攢鋸齒豈意骸積黑英臺  
血成太子河中水千山繇互徒崎嶇雷霆精銳歛坦途  
合圍十日十夜戰二十萬衆膏莽蕪弧耀日梯衝入  
鼎魚穴蟻嗟何及焚香牛酒犒王師士民喜極翻嗚咽  
陪都原廟猶氛埃昔日發祥何有哉清祖行兵本容易



順流長驅從北來君不見朱明經略袁應泰孤軍曾此  
 遭顛沛死遼葬遼鬼夜號陰風吹火而旗旂又不見今  
 之克魯巴圖金敗馬無聲淚滿襟鴉啼鎮遠樓頭樹一  
 種悽惶望闕心諱太祖天命六年已取奉天進圍遼陽放太子河水於壕乘勢驅殺溺死者皆  
 暨皆滿水盡亦明經略袁應泰在城東北鎮遠樓監戰城陷乃于樓上望闕拜  
 疏曰臣至遼見人心不固不可以守是以有死遼葬遼之誓今  
 吳陷臣力竭而死望皇上收拾人心為恢復計遂焚樓自縊

雙芝仙館翦燭集和夢山原韻

零星秋卉偃匡牀白露變為霜氣涼只有葵花能衛足  
 陰廊黯澹尙傾陽

長安明月夜徘徊欲向擣衣砧上來何處南山雷殷殷  
 遠征君子憶歸哉

桂香撲鼻令人參禪悅偶念王勃有蘿幌栖禪影  
 句口占率賦

無奈如來金粟何月中惱煞老維摩秋深蘿幌栖禪影  
 一種妙香吹曼陀

雨中雜述次冷灰原韻

檀欒二十六  
集席上作

閉門冥坐與禪同鎮日騷騷屑屑中梧鬧秋聲防井塌  
 屋撐雨勢免茅空天寒征雁啼從北河濁枯槎走向東  
 且惜階花顏色故馨香三嗅悵臨風

檀欒集席上邂逅佐伯周芳惟馨又聞故人將出京  
 者甚多分韻得麻卽賦道情



白髮新知重九酒擬同側帽醉中斜故人多半辭京去  
還怕秋衰十日花

又和石埭原韻即送其游西京

東山仙襪乍聯翩絲竹并尋翰墨緣野鴨柳塘秋嫵媚  
箏船笛榭月團圓不將餘慧追牙後且使新詩在筆先  
瘦硬八分兼草隸墨梅亦是一家專

來青閣翦燭集和禾原原韻

盍向西都結伴游鴨東盡把繡簾鉤青山紅粉看如畫  
總讓楓人醉作秋

時石埭將游西都故云

老少年叢秋遶廬臨叩醉煞渴相如白頭吟罷紅猶故

冶習真成不可除

席上分韻得侵

世間難值是知音翦燭秋來更苦吟不語人拈無孔笛  
有聲畫似沒絃琴

又分韻得鹽

風情秋老客中添詩向天涯任手拈南國相思種紅豆  
西京時冷灰從長崎歸豔夢入香奩石埭自京洛至文章各擅家家玉歌曲新

諳昔昔鹽薄夜檀痕還細掐不知霜月悄來覘

雙芝仙館翦燭集和夢山原韻

公退清閒觀物情縈簾茶靄愜秋晴化工不費丹青手



橘綠橙黃各自成

斜陽紅意片時休那似一林霜色留日日夕昏朝暝裏  
丹楓罨作畫屏秋

又分韻得麻

自從籬落瘦黃花老圃蕭蕭日影斜賴飽霜林醉滋味  
故丘不復憶秋瓜

席上讀石埭客中詩卷卽次原韻

一舫煙波任所之平生書畫有心期歸來編作松陵集  
茶具如何不入詩

又用禾原韻卽促上夢香真行吹笛

此笛曾邀何處家廣寒宮闕夢中賒聽風聽水霓裳序  
吹向天心月亦斜

龜茲仙樂入雲寒況見詞葩溢筆端不信溫岐八叉手  
當筵有孔欲吹難

夢香竟奏一曲因賦此爲贈

法部開元衆妙該含宮咀徵亦仙才真疑鸞鳳瑤天嘯  
休比驪山阿濫堆

恩光閣卽興賦呈土方秦山公久元

杏葉黃黃楓葉紅霜前菊後夕陽中留將晚景怡心目  
始信天心在善終



席上聞蘇言器中歌唱醉中疊韻

恍對銀尊剔燭紅  
嘈嘈切切小槽中  
手如白雨聲如縷  
羯鼓纔停曲未終

寒翠莊觀楓雅集次夢舟原韻

名園許我履綦侵  
一帶霜楓對醉吟  
林表殷紅忘日暮  
夕陽窅翠入秋深  
天孫乍降機絲影  
彩筆誰傳錦字心  
興到何妨挑絳燭  
畫廊佇聽漏沈沈

讀石埭經王寺作有感卽和

寂寥眞覺法燈微  
墓道無人霜葉飛  
世事波瀾隨倒勢  
詩家風景惜斜暉  
廿年身迹我如此  
一瓣心香君未非

慙愧空林來醑酒  
殘鴉聲盡淚霑衣

星陵小集送渡邊金谷學士千代之浪華

天寒空谷數莖青  
簌簌有聲乾籜零  
卻憶子猷乘興去  
澗江風雪一篷聽

尋春明日興應賒  
煙水怡人是浪華  
雁齒紅橋鴨頭綠  
菅公祠畔看梅花

又送葦原鐵蓮師歸天草

與君桑下思三宿  
偶向星陵同喫茶  
一鉢一瓶緣亦妙  
火中鑄出鐵蓮花

狂韻五律戲效俳體歲晚檀欒集賦此



居然溷落放歌狂內熱難防性桂薑  
幸喜水清魚不見誰云積小璧能藏  
雞蟲得失人爭校土木形骸世未忘  
文字聲名俱作崇幾回沈飲對空觴

隕葉蕭蕭夜雨霜頭顱四十悔疏狂  
麒麟動業思前輩草莽英雄在下牀  
世法拘人空局束書生憂國亦尋常  
平空誰使豪鷹颺一擊鸞臬不竝翔

羯胡無賴恃巖疆聞說折骸猶作糧  
死力一隅如此險游魂半歲至今狂  
魏貅盡願皮留豹霹靂何當血飲糜  
遼海安瀾洗兵馬始知固不在金湯

劇談抵掌吐雄芒窮景崢嶸兩鬢蒼  
蒼時局冥鴻須遠避

酒杯水鏡自端相起爲頓挫瀏灘舞  
拚此飛揚跋扈狂怕被旁人窺醉態  
龍車揮臂有螳螂

逐逐塵埃野馬場且將醒眼閱炎涼  
人間吾事詩堪畢天下君家酒可嘗  
笑視乾坤齊蟻垤恥開戶牖作蜂房  
鷓鴣腐鼠何須嚇分付兒曹自在狂

至日雙芝仙館翦燭集分韻得侵

圍坐屏山疊何憂夜氣侵冰絃彈月  
起霜屨響廊臨況有微陽返猶賡白  
雪音小梅花可可破笑見天心

新濱御苑打鴨歌

十二月廿九日

人間歲月熟羊腴天上仙曹同打鴨  
星言夙駕循天衢



撲面霜風吹習習旋覺暖律回嚴凝全忘窮景逼殘臘  
出城三里熹微生霽心恬日海波帖直將海水控上園  
數派線流溝澮狹內僅容輟豫投餌外通溟潮限以牖  
左右陂塘隱見間人人輕裝倒戴恰擒生不用竹枝弓  
舉網如懸金鎖甲堰口乍開萍浪圓遣鷺爲媒誘鴨入  
鴨卽見鷺不見人鷺鷺相呼鴨相咬嗟然一響水扉閉  
鷺故不動鴨意急拉雜驚飛網亂交倉皇欲遁還紛遯  
可憐已陷重圍中突遭狹巷短兵接雖有梟雄可奈何  
矧茲阿子空恇怯樂府有阿子歌謂鴨也入網拍拍鳴聲哀羽毛如雨  
灑蕭颯他他藉藉何其多自午及晡未言乏爭先奪彩

意氣揚快比三軍齊奏捷王師十萬超鳴江彷彿泰山  
纍卵壓戰克將軍振旅歸闕雷殷地驪聲洽尙方頒饌  
離宮旁調劑割鮮倒酒榼天恩浩蕩神融怡和煦生春  
如纈挾子雲平生不曉事何幸長楊陪羽獵霑醉作詩  
擬公醺才薄還愧應劉鄴



槐南集卷二十三

槐南集卷二十四

東京 森大來 公泰

乙巳

元日恭賦御題新年山

龍蛇割晦明 譎變雲霞狀 日出海中山 春生八荒上

人日啜茗雅集席上和天龍原韻

頭顱拚此鬢華新 且喜飛觴隨手臻 銀燭離離卜良夜  
玉梅的的媚清辰 綠鬢行雨來巫峽 羅韞淩波集洛濱  
醉擬冬郎才綺麗 筆驚鸚鵡賦青春

哭蒼海先生



寸心炯炯朗眉鬚儀表元樞百世模報主夙期文有道  
微公或恐國無儒聖朝耆獻終凋替華屋山丘倏邈殊  
英爽不亡猶在眼凜如皎月鑑冰壺

金鏡寧知頓晦光典型萬古儼文章禹謨堯典供塗改  
孔思周情審酌量鐘律高懸繁奏息鳳毛四照衆禽藏  
顧慙雕篆違知遇後死空焚一瓣香

檀欒清集冷灰主人出金剛力士一尊索詩率賦

當關閒誦穆陀編暮鼓晨鐘閱幾年劫數早知終寡偶  
撓呵枉自護諸天團欒居士無生話龐居士偈大家團  
欒頭同話無生話寂寞金  
剛不壞禪我是浮圖門外漢試踰鐵限問因緣

南佐莊雅集席上和鸞洲公子韻

招邀觴晦日良晤暢幽情綠酒芳尊滿銀鐙綺席明竹  
圍君子館花動女王城自此足吟約無邊春色清

立春後一日游百花園和祇南海書幅韻

曠逸古名士多與梅花親暗香沁心肺清言霏吻脣如  
今愛花者吾輩三五真詩外儘成癖醇酒與婦人

玉池一半兒雅集兼似禾原

消寒俊侶聚琴尊佳約將追古上元久歉豪懷殊少日  
猶憐春信是初番屏風圍坐月微覷花氣襲人鐙欲言  
未羨新歸天外客歌聲舞影會銷魂禾原有歌聲  
舞影句故云



石埭斜庵茗醯邂逅鈴木鹿山次韻卽賦

一炷銅鑪香未灰坐聽湯鼎靜中催梅花三昧詩禪悅  
并入斜庵茶事來

檀欒集席上卽興志感次冷灰韻

雪驟霰先集天陰雲亦同佳人猶倚竹喬木或傷風名  
利莫須有毀譽亡是公孤芳須獨立花動峭寒中

又一首

百罰何辭金谷尋春風萬斛主人心胸襟久納滄溟闊  
更喜酒觥如許深

春分八百松樓卽賦是日忽雪旋晴光景莫測因

呈席上諸賓兼贈山陰橫山耐雪

不多幽賞貴招攜一笛高樓望轉迷吹得落梅翻作雪  
飛來乳燕尙銜泥酒鱗缸面紅旋涌草甲裙腰綠略齊  
興到方知春意厚空濛煙景讓人題

化工戲罷夕陽新樓閣空中捉幻塵水月鏡花非剪綵  
風裘雪帽亦嬉春山陰祓禊蘭亭遠江左文章玉樹親  
安得羣賢畢乘興碧雲采采抵淞濱

雙芝仙館翦燭集分韻得魚

惺忪楊柳乍黃初綽約花枝欲動餘非雨非煙相體貼  
春風此外更何如



席上和夢山原韻

花覺玉蘭香自生春風檢點到清明暮寒不重一團雪  
穠壓闌干如有聲

分明舊事上心來泥酒情懷春未灰還記風花狂不定  
飛香到手覆深杯

又兼贈禾原

鷓鴣天遠暫分離相值嬌鶯百轉時酌雨量風春性格  
歸來終不負花期  
客心屢向酒杯降滴滴眞珠響小缸不羨鴟夷五湖興  
金釵十二載吳艤

墨江行用溫庭筠東郊行韻

檀樂三十集  
墨水舟中作

灑灑溶溶江一道夾江碧膩煙絲草百年無數蠟屐人  
看花不知幾回老軋鴉蘭楫沿渚蘋芳尊酒浪生細鱗  
大隄女兒巧眇睐珠鈿瑟瑟遺輕塵印沙玉臂爲誰守  
風花晚向舞茵走河房鐙炮船尙留明發鶯啼澹黃柳  
舟中和冷灰原韻

欲風欲雨替花愁事不關心只白鷗飛去飛來都自在  
紅蘭碧杜滿芳洲

細膩風光罨畫天啼花百舌破冥煙提壺得過且須過  
喚取佳人齊上船



看花無若畫船中宛轉回橈款款風隄上游人蟻旋磨  
不容油壁不容驄

畫鼓朱衣隊隊分如荼如火美人軍鶯花一霎風塵了  
羅綺猶屯十里雲

罽毼櫻花障晚寒風搖倭墮髻雲端匹如元祿嬋娟樣  
古錦屏風畫上看

玉池翦燭集卽興道情和夢山原韻

羣芳一例化成煙賸箇海棠紅可憐牆角垂垂猶自主  
勝他柳絮軟飛絲

麗句安排讓綺年春衫酒暈尙依然休言葉綠花無力

未覺風情少似前

又分韻得青

風緊花飛不暫停夕陽紅迹乍零星卻憐衆草難芟盡  
隨意萋萋綠滿庭

效香山諷諭詩

狡狴搏熊羆百獸皆讐悻殺氣崖谷回腥風林莽被熊  
怒聲咆哮狴奮力最負一擊中要害將欲割其截龍失  
鱗甲威虎斂爪牙利鯨鯢爲潛匿鯤鵬亦回避流血已  
云慘禍比烈炎熾川原蕩一空只恐無噍類鬼峩巨白  
象居中翳昂鼻願體天地仁息鬪救顛躓樂從不復疑



猊兮故多智豁達展雄風虛已徇大義奈何身內蟲侈  
口肆橫議或欲截熊掌或欲斷熊臂或欲寢熊皮或欲  
舐熊髓紛紛無忌憚申申仍善詈見彈思炙鴉未察敵  
情僞持狹願卻奢良圖安可覬熊雖負鉅創豈忘跋扈  
志猊雖示洪量亦豈功廢簣國家有戰伐本以懲貪恣  
必絕百年患此事何容易誰學獅子蟲曉曉舉國醉莫  
令象鼻掩遽謂前言戲

首夏翦燭集和夢山原韻

鶻喚春歸有底忙滿庭午影靜中長筍餘櫻晚饒風味  
蕁嫫還吹碧澗香

忽忽蟻夢古槐柯一理彭殤奈命何萬事空中尋鳥迹  
不如稱意眼前多

寧齋歿後十日同人會上野山王臺舉酌羞之典  
率賦一章志愴

不使伊人貢闕庭多才短折恨冥冥白虹霄漢沖孤憤  
金薤琳琅付六丁前日有風雷之異鬼奪嘔心長吉壽天添吐燄少

微星廣陵散絕空山闋向笛淒清淚白零

寒翠莊檀欒集和冷灰原韻兼贈夢舟

烏鼠同栖偏得適豚魚微隱亦能孚置身木雁中間好  
演雅煩君并作圖



清暑亭臺水石鄰  
彈琴魚躍入蕤賓  
紅榴多子差強意  
不屬浮花浪蕊春

鳴禽已變樹陰幽  
風靜松花灑茗甌  
似此園林日成趣  
董生亦合廢春秋

又和夢舟原韻

林丘寂亭午一水瀉  
潺湲旋聚古槐蟻  
未聞高樹蟬夕陽沈  
翠巘松外只蒼煙  
物我澹將忘觀魚莊惠前

日本海海戰大捷功成歌

水犀練甲赫專征  
電激風行薄海驚  
驅駕洪濤擒頡利  
披攘蒙霧殄氛鯨  
蛟鼉遠自玄冥北  
鯨忽周流弱水西

怪魅到頭虛眩耀  
羣陰遭日伏雌霓  
軍容整暇旆旌閒  
以佚待勞三月間  
神鬼莫窺方略祕  
藏舟對馬壹岐山  
紫溟直北鬱陵南  
一舉天驕百醜戡  
烜赫帝功輝八極  
欲回宇宙入囊龜

諸將鬚眉颯爽同  
龍蛇慘澹決雌雄  
聞言奏捷甘泉殿  
并錄飛灰萬骨功  
擊沈十有二鱉艦  
罔兩游魂逐浪空  
坐看海祲歸蕩滌  
威靈全不借神風  
燭龍燄澀晝冥冥  
誰喚幽都噩夢醒  
兵盡國危空恤後  
孱王掩泣抱螟蛉  
倒懸欲救海參崴  
強效魯陽戈一揮  
逆道違天波赤血  
可憐魚腹葬封豨



六月十七日靜園莊雨集次仙坡原韻

萬象陰晴變一壺留賞奇忘憂惟此物言志莫如詩衆  
我醉醒耳聖賢斟酌之去騷真未遠分付世人知

又絕句一首

苔意冥冥樹意濛靜園看雨綠陰中牆頭暗地鶻啼過  
放出幽花四五紅

又七律一首

風流曠世見夫君同此襟期鄭廣文石有蒼苔全是雨  
屋圍綠樹半爲雲池中吠蛤參禪悅竹下鳴泉洗俗氛  
對酒不論當世務諸公袞袞任垂勳

十八日甫里綺里看菖蒲作

霽不終朝雨復來看花客乍僦車回菖蒲似待游塵斂  
靜向無人見處開

星岡雅集晤清國笠雲禪師率賦二律以贈

一杖穿雲浚漢槎來尋海外會無遮扶桑徧蔭菩提樹  
方丈還開震旦花講罷人天清磬徹吟成日暮碧雲賒  
乾坤蹴踏從龍象浩劫何須話恆沙

往年舟楫阻江沱搔首三湘悵望多嶽麓道林縈夢寐  
赤沙青草渺風波君能東海浮杯渡我願諸天載酒過  
便欲因之詢勝槩壁間杜句定如何



梅子黃時雙芝仙館翦燭集分韻得支

雨中冥坐獨沈思如夢諸緣無了時忽憶一蓑煙景好  
縱橫野水渺連陂

藕根淺角漸離披寸寸魚苗動藻漪咫尺儻論千里思  
江湖亦自在盆池

又和夢山原韻

雨庭濛似隔紗看幾箇梅丸葉底團誰把金篦來刮膜  
吾詩故未別鹹酸

酒客尋詩興未闌幾回點筆石闌干讓君飲茗風生腋  
不使談天舌本乾

時裳川善談  
媿不倦故戲之

又分韻得麻

詩龕十笏見秋花鳥佛無言瘦意加也好解衣磐礴坐  
芭蕉葉大雨些些

池上本門寺清醮卽興賦呈靈龜上人

翠嵐晴敞萬重林兜率鐘聲隱細岑午靜松濤虛籟爽  
暑微花雨妙香深宰官偶現招提境界教應關濟物心  
傑閣乍疑從地涌青蓮世界共登臨

遠近山莊檀欒例集卽和冷灰原韻

道暑山中小隱成雲相怡悅月逢迎透風軒敞延林影  
吹笛牀涼寫水聲松石之間能會意神仙太上豈忘情



羨君福地攜嘉耦  
蛾綠供餐酒滿傾  
陰厓蒼帶百年苔  
白霧丹霞日夕開  
箕斗屋椽天插出  
雲雷洞壑雨飛來  
仙源堪忘秦爲晉  
勝景何論蕩與台  
儻待向平婚嫁畢  
歸心不怕老鶻催

疊韻答種竹

驂鸞縹緲董雙成  
絳節雲霄冉冉迎  
婉孌峰擎冠帔影  
潺湲泉和佩環聲  
冥搜偶作游仙夢  
遐討方知造物情  
多謝谿山招我意  
瑤華相寄寸心傾  
水明樓閣夜明苔  
步履相攜襟抱開  
蘭若幽扉隨月款  
豆花小雨聽秋來  
曠懷天闊沖孤鶴  
壯志煙高拂上台

愧我蘇門初學嘯  
詩成只比候蟲催

游闕伽流山

楞伽山色碧巖岈  
石筍參天路百盤  
蒼檜當頭圍嶂藹  
明泉徹底照人寒  
妙香應現芬陀利  
寶刹曾栖竺法蘭  
鐵鎖欲攀齊脅息  
上方鐘梵隔危巒

山莊分韻得支中  
元前一日將出山  
適雨賦此留別

偶然小住欲歸遲  
領略煙郊雲壑奇  
卻怪山靈相祕惜  
鶯啼鶯默雨淒其

笛吹嶺和種竹見  
懷兼似湘南



天宇浪溼銀河淺側身東望碧雲卷白鳥帝子神徘徊  
仙馭不前美人遠我曾尋巔杖煙策古愁猶動窅冥色  
竦身俯視清冷淵有似蛟龍懼罾弋竹君詩句何高寒  
瑤琴一弄哀淚殘韓湘招手爲破笑還作秦嶺藍關看  
車中和湘南

懸崖坐嘯翠微間一笑隨君撒手還咫尺神靈興白霧  
忽然眉睫失青山偶尋丘壑緣前約未信仙凡是異寰  
休道重來迷洞口歸家也好夢中攀

自輕井澤歸後數日追次裳川韻寄冷灰聞冷灰  
山中記事頗涉無稽因以相戲兼調石埭海雪湘

南在山苦霧

巖幽戶牖鑿空翠不羨詩人鑑湖賜獨嘯萬壑千峰雲  
盪胸故自天際意去年蔣徑稍闢三大山小山來往語  
便道容卿數百輩此中空洞如澄潭雕龍炙輅胡爲者  
有時吞盡雲夢野一嘯寸木高岑樓譎奇誰復辨真假  
我昨去振千仞衣下山未覺陽卉腓三君踵至墮寒霧  
卻驚徂暑無停機襄城迷聖復相似有智難追三十里  
主人大笑指虛無何不問道廣成子

寧齋詩話題辭四首

嘯樓坐對客忘疲腹笥清朝萬卷詩六一滄浪東高閣



翻瀾妙舌解人頤

此人此事忽千秋  
邈若山河血淚流  
痛絕盛名然自劉  
一棺雖蓋亦悠悠

誰言識字是憂艱  
坎壈纏身本等閒  
萬古奇才同一厄  
未聞金盃出人間

等身著述亦如煙  
身後何關傳不傳  
惆悵空帷飄白屋  
一篇詩話隙光前

大江揚鶴

明星山房雅集次主人原韻

簾漪風卷起茶鼎  
似鳴蟬苔翠明於水  
簾絲裊欲煙壺  
觴邀韻友泉石謝  
塵緣此夕天無月  
明星獨爛然

百花園看秋卉有作

尋春曾此鬪妍華  
豈意芙蓉木末斜  
賴是一年紅不了  
蟋蟀聲裏看秋花

十七夜玉池一半兒集對月限用杜韻

後夜猶前夢瓊樓  
玉宇身乍遭雲漏  
月有似酒醒人陰  
翳難相掩團圓亦已頻  
不知風露氣高處  
一寒新

雙芝仙館翦燭集和夢山原韻卽以道情

斷金零粉怨斜暉  
照到秋花影亦微  
爲是霜風如許緊  
夢中蝴蝶醒初飛

詩催人老促人寒  
落盡鐙花拍盡闌  
百事雞聲馬蹄外



茫茫對此感無端

又和夢山卽興原韻

人境不聞蹄與輪結廬自是隔風塵疏籬篩出黃花影  
宛似陶家漉酒巾

批風抹月作詩人萬古只爭光景新天遣霜楓如錦繡  
小春端的麗於春

又分韻得陽

林葉是紅籬菊黃風情總在酒杯旁人間晚節天應惜  
故爲淵明駐夕陽

花月會席上分韻得微

時節秋風過授衣無家雁亦向南飛田園任是何人有  
只有黃花便欲歸

本門精舍觀楓唱和用杜牧山行韻

一林塔勢矗雲斜絕勝淨名居士家楓葉宛如天女豔  
不須對佛更拈花

又一首

一磬聞四山諸天忽人迹陰壑生娟姿高林澹將夕斜  
景旋一明樹紅照潭碧中有錦鯉魚錯疑落楓積旣飽  
伊蒲供覽物各其適不羨臨淵者悠然對楸石

古曆十月望來青閣翦燭集兼送海雪赴滿洲



月中霜裏燭枝前欲問嬋娟孰是仙謾鬪素娥青女色  
酒光詩燄已連天

後夜送人明月船昔鹽一曲綠尊前戰場此去霜應白  
回首周郎赤壁年

又分韻得刪

銀河吹笛羽衣還星斗稀于霜鬢斑不見鵲飛三市影  
月明正在樹中閒

席上次王彭園詩韻賦贈

暮年詞賦庾蘭成腸斷江關數十程搖落何人能賦恨  
寂寥我輩只鍾情不多知己雲同散忽漫相逢月暫明

戶外秋風蕭瑟極綢繆翦燭且傾觥

檀欒例集禾原攜井陘楓葉來臨卽用冷灰原韻  
賦此

丹崖斫取一林紅來御泠泠列子風歛見歸裝帶霜色  
快如飛鳥下秋空醉顏略駐少年相暮景纔收斜日功  
怪底煙生堂上樹殆疑身在畫圖中

永阪石埭華甲壽言

新詩老去益清妍雪聚花穠照壽筵緣有綺才班綺皓  
定知華甲壓華年夙推體擅漢甄字不願形淩唐閣煙  
除卻平生墨梅妙幾人能貌玉池仙



寒翠莊雅集和夢舟原韻

輞川水木賞還新分付楓人引醉人野氣山沈仍受日  
壑姿霜挾驟回春菊殘如待餐英伴林茂何妨撲棗鄰  
正使汎舟窮杜老杳然乘興不迷津

津宮樂壽園席上作

福人長壽樂天全延學滄洲萬景鮮雲豁澄江橫匹練  
樹平孤嶼媚中川浮空髻影數峰露離岸鷓聲遙雁傳  
回首翠微殘照底大祠簫鼓奏神絃

又次種竹韻

煙水蓬瀛別一壺醉中調笑酒家胡偶然乘興古如是

范蠡扁舟張翰鱸

飽看勝景絕寰區蝦菜江鄉賞未孤八箇詩人蓑笠影  
霜風吹送入菰蒲

聽潮來曲

十六青螺十二橋往還帆影去來潮悠悠江上煙波笛  
譜入蘋洲韻最嬌

十二月七日偶成

笳鼓破窮景霜風吹大旗車騎蔽郊野日昏雲四垂國  
家有薄伐安得無瘡痍積將萬白骨固此金甌基因念  
諸將帥歲暮方班師歌呼滿城闕誰誦東山詩惓惓不



歸者零雨令人悲

雙芝仙館翦燭集卽興和夢山原韻

不似詩人霜滿頭芭蕉葉葉尙如秋那堪聽盡一年雨  
翦到臘燈紅更幽

娣菊似葵生有涯梅兄礬弟興猶賒豈知衆卉凋零後  
還有山茶歲晚花

載酒江湖我亦堪錦鱗憶昨釣閒潭相思匹練綺霞外

鰕菜忘歸綠浦南

日前游香  
取故云

又分韻得寒

百戰已安東海瀾恩波浩蕩及三韓自茲不怕朔風勁

憐取江山他自寒

至日芝館燭集戲做豔體卽用夢山原韻

通紅鑪火靜煎茶笑對小窗橫幅斜從此宮閨饒樂事  
日添一線繡梅花

釵橫特地鬢欹鴉肯道幽姿世外賒也好臘燈春酒夜  
銀屏宛轉勸銀槎



槐南集卷二十四

槐南集卷二十五

東京 森大來 公泰

丙午

早春江木冷灰招飲待我歸軒補用日前所分韻  
以道我情

平生百事總輸人只喜當杯酒入脣舊習漸除防裂景  
新正已破且嬉春休停清夜沈沈酌免趁諸公袞袞塵  
老去初知廣文好尊前調笑不須嗔

又和冷灰原韻

重簾淺夢幻中真無奈梨花雪更新不及一層縞霧裏



玉梅斗帳益生春

大江敬香澹如水廬小集次韻

王師至白遼開歲半還朝犒酒椒花醞賜題河水迢鳳  
城那有禁鷗約不須條好引淮澗滿酣歌達夕朝

一月二十六日東京市參事會奉邀清國宗室澤  
公殿下張醺上野梅川樓大來陪焉卽賦五言長  
律二十韻以紀盛事

溟漲無空闊乾坤盡橫流六鼇能戴土萬國正同舟禹  
會邦維舊堯巡路遂適啓思千載聖紆切兩宮憂寰海  
宜咨度宗潢協惠疇觀風追縞紵破浪展謨謀東汜西

崑外南箕北斗陬驅旌互霄漢稅駕白瀛洲霽雪明鱗  
瓦卿雲爛鳳樓陽和回玉律輓繡轡瓊輶魏闕驩慶洽  
齊民禮數優覲儀仙縹緲賓醺樂夷猶講信方申約親  
鄰克壯猷障瀾會砥柱入室息戈矛願以文明化行將  
日月侔憲章資述作師法慎遵由物競趨殊尙天驕豈  
異儔要荒風可采幽眇理堪求走忝羣賢末翻增舊學  
羞佇看齊魯變諸夏永弘休

二月澹如水廬花月會次敬香韻

俊游有約訪仙肩翠羽啁嘈喚夢醒冰雪知君心共淨  
漁樵爲我眼應青雨寒石澗流澌合風驟花林急霰零



也好披篷酒帘下相攜指點索銀瓶

團欒例集次冷灰原韻兼惱種竹

銀燭紅氍舞袖旋李延年與李龜年罷翻醉客清平調  
私進佳人獨立篇傾國傾城思玉樹聽風聽水抵鈞天  
笑余古井無波久夢折花枝欲抱煙

三月十三日島田湘洲

孝之

招飲柳橋深川亭卽賦

紅粉曾回杜牧之重來仍認舊亭旗簾波乍綠如無影  
檐柳初黃未有絲豆蔻梢頭春意早桃花人面夕陽遲  
謝君與畫雙鬢壁不使河梁唱別離

雙芝仙館翦燭集和夢山原韻卽景卽賦

宮體銷魂寫不成雨中春樹總含情數花更愛銀瓶小  
玉茗吹香白雪明

花雨霏霏彌晚空由來詩境屬冥濛齊梁豔句閒金粉  
故在紅情黯澹中

又和夢山席上詩韻

金尊萬斛汎銀槎不羨胡椒八百奢側帽花前拚一醉  
詩人難斂是春華

茶事清宵可入詩沈沈鼎韻不妨遲誰將桑苧閒風味  
品到殘鐘宿火時

又分韻得覃兼似石埭



日日鶯花事事酣忽聞春雨憶江南人如踈地垂楊柳  
記向旗亭小駐驂

詩興未盡卽用禾原所得韻賦一律

芳時醺賞愛優閒休道好晴天偶慳苔滑石闌疑在水  
煙濃花朵欲成山停杯人佇春檐際揀樹鶯藏暮雨間  
禊後餘寒緊如許香篝爲炷鷓鴣斑

念一日含雪亭醺集席上次鸞洲伯韻

信應呼作影梅庵水繪名園曲曲探魚戲卻疑蓮葉北  
酒酣如在杏花南紅樓偏覺碧虛敞翠袖知非烏有談  
乍奏紫雲迴一曲陳髯詞句妙香含

四月八日大澤鐵石與招飲墨江舟中分韻得水  
字

輕雲澹日嬌羅綺江上看花宜艇子信覺春光澹沲浮  
激激澹澹溶溶水

二十九日冷灰招同檀欒會諸子汎舟墨水舟中  
用杜陵風雨看舟前落花新句韻

裊不勝風春柳枝夏來堪折作樊籬解飛乳燕辭梁去  
作隊游魚聚浪吹誰看綠陰回桂楫餘寒未覺生衣怯  
黃帽權郎閒泝洄青谿花妹來迎接荇葉參差蒲葉高  
水鄉風味藉谿毛盪船一笑翠裙溼玉手膾鮮金錯勞



五月一日花月會分韻得文

屋檐鳩語歇鳴溜晚來聞彈起蜀桐韻流成湘簟紋芭蕉融綠蠟芍藥熟紅雲夏淺猶幽賞壺春細細醺

靜園莊小集卽次仙坡原韻并送其赴北海時陽曆端午後一日也

愧隨枚馬謾稱賓俯仰梁園迹亦陳鴻爪雪泥空復幻蘭因絮果苦難眞餞春杜宇新端午破夏瞿曇古誕辰南海吟成還北海羨君未作倦游人

醉中放言用杜韻

千秋萬歲名只校辱兼榮風教苟堪繫詩人休自輕一

杯君且盡衆濁我能清艾葉榴花候離騷痛飲情

玉池翦燭集分韻得虞詩則記昨日湘南車中所見云爾

桔槔深柳兩三株五月江村蓑笠圖忽地冥煙鷓叫破家家雨綠插菖蒲

來青閣齋集次仙坡韻送別

芳草黏天浪拍天知君詩句盡堪傳鯨音北海壯須掣琴意綠陰愜欲眠塞上美人休換馬花前博士本稱蓮他時風雪蓴湖路欲畫騎驢孟浩然

玉池詩龕分韻得寒卽賦呈蒙古土爾扈特王王



自署天山擁花客七八故云

蒼茫東海引杯看想見名王氣度寬  
朔漠久推賢贊普單于不數舊  
呼韓輿圖移帳超欽察河漢尋源到  
幹難還好蓬山擁花住祈連回首雪  
猶寒

偕樂園十名士追薦之筵即席志感

十名士謂副島滄海長岡雲海巖谷古梅勝間田蝶

夢野口車齋北條鵬所岸田吟香金井秋蘇山田新川長谷川城山

四海賢豪隨逝水九原師友逐銘旌  
炊梁飯頃曾同夢擊石光中暫此生  
猛觸古愁聞杜宇多催新淚濺清明  
茫茫人代風騷遠愧附諸公浪得名

雙芝仙館翦燭集席上雜詩

幽人蹤迹午猶稀  
梔子花香風又微  
簾影滿堂琴不御  
靜聞燕子觸絃飛

雜草緣階手剗除  
濃陰嘉木自扶疏  
鳥飛不倦斜陽轉

臥讀陶詩適有餘  
右和夢山原韻

幽閣真疑谿壑憑  
叢篁古木繞蘿藤  
晚來山子鳴如磬

一點新涼動石鐙  
分韻得蒸

橄欖未輸崖蜜甘  
茗談何讓酒場酣  
松花滿盃風生腋

真味都於苦處參  
次夢山韻時  
贈戒酒故云

品盡司空廿四詩  
懲羹無奈膾還吹  
勸君且莫求形似

龍眼爭能竝荔枝  
和夢山原韻



花月會席上次敬香原韻

槐夏鳴蟬驟濃陰綠四周閒移笛枝簾恍上羽人丘琪  
樹涼于雨銀灣澹作秋欲邀明月飲傍晚且遲留

芝浦海樓送仙坡游清韓即作短歌一首其中一

解用留別原韻

溟浪吞蓬壺滔天白浩浩送君萬里之長風驅山走海  
倏忽卷去無數蜉蝣島方今覆載無遐陬不須海客八  
月舟天漢亦可褰裳游何況清與韓咫尺一水盈盈秋  
浮杯從此渡司馬浦口百尺樓酒闌雨霽涼滴樹明月  
忽然照征路一仙坡作百仙坡千波萬波載君去

來青閣翦燭集即興

雨裏園林樹裏家安排斐几對幽花麝煤鼠尾都閒著  
得意苔縈韻字紗

和禾原原韻

葉葉雲從牆角生綠天自是黯難晴愁人也似芭蕉樹  
不可支持是雨聲

樹色惛惛雨色加當軒靜似野人家霏微鎮日無啼鳥  
安石榴開四五花

右和夢山原韻

風懷止酒漸無聞叵奈尊前詩思紛造次持杯忙縮手  
背人還把戒香熏

分韻得文

峽中懷古二首



天險依然鳥道通當年躍馬想豪雄豹韜奇譎陰符變  
龍血玄黃野戰空絕壁峽回夔子國空山寺抱隗器宮  
可憐割據英風盡哀壑猿聲落日中  
金牛鑿險莽悠悠百戰蹉跎志未休吹笛中宵空北走  
淘沙衆水尙南流岷峨悽愴龍媒死王霸銷沈虎氣愁  
腸斷黑駒山下路葡萄一縣不勝秋

酒折宮

武尊辭帝鄉一劍掃鴻荒氏道魚鳧伏沂山鳥鼠藏神  
功經國緬嶽勢拄天蒼龍種風流在賡歌創柏梁  
諏訪水明樓醺集倚種竹韻紀之

俊游先趁鑑湖期洗盡塵衫京洛緇如沐晴巒衣桁暝  
欲風細浪簟紋吹鷺來鷗聚隨緣好燕姁鶯嬌作興奇

二妓佐  
船故云

明日扁舟采須惜錦鴛鴦覆碧蓴絲

八月二十二日諏訪湖舟中作

勝緣今始識鷺湖萬嶂平臨雁鷺區菰米沈雲含澹澗  
芙蓉倒景浸虛無四圍翠黛壺中蓄一道濃藍鏡面鋪  
賀老稽山同此樂興來高拍酒船呼

鷺湖逢上夢香有詩見贈卽用其韻并志是日之  
游

昨夜遊落湖天星聲殷寥廓驚神靈怪君一笛不滿尺



直奪張樂軒轅聽今來艤舟龍峽口禹鑿不到天門青  
那知砮崖轉石勢發源惟此淵清冷

上諏訪神社

八嶽開崢嶸細岑入幽眇地若盆盎底坡陀漸曠衍衆  
水匯爲湖澄霽明匹練陰霞旋興沒晴暉迭隱見一巘  
翠微間萬木環古殿傳是神宮寺林樾帶禪觀松栝吟  
長風藤蘿冒幽澗游廊白日暗壞道蒼鼠竄我來正盛  
暑淒氣颯已變瞻仰肅蕭爽徘徊發浩歎粵古鴻濛初  
神也勇搏戰力屈武甕槌奄馳趕飛電蒼籬海可蹈豐  
葦國乃獻刑天敢舞戚羽淵免殛譴跡留巨巖遺澤

徧湖甸陰火煮靈湯杭稻霑漑灌騰氣吹輒然不復恤  
炊爨葑田更萬頃拍拍鳧鷖亂蝦菜亦云贍味腴雪白  
蜺回首望下宮嵐嶂含餘絢空水相因依霏作碧雲片  
羽衛擁神旂春秋分祀祿想像踏冰時白霓卷霜霞我  
昔游雲中杵宮致菲奠草味經蜻洲遜德慕堯禪君臣  
一定位萬祀無弑篡父子居異方念之爲悽惋詎料濟  
勝緣復此蘋藻薦神實知天命臨難貴一斷守土不外  
遷終得眞宰眷默禱搖寶鈴顯靈豈里諺國基信呵護  
四柱屹霄漢

念三日南信車中邂逅夢山樞密卽興口占



邂逅煙嵐潑眼青犀牛峽口水泠泠少時照影還相笑  
同是鷺湖酒未醒

又次夢山鷺湖絕句原韻

鼠船小小艣枝銜菱葦中流淨似芟巨浸山縈青玉帶  
清暉波熨碧羅衫

信越分水之嶺輪行殊緩秋花可觀次種竹韻

鎮日人行翠巘間飄輪卻較白雲閒屏風九疊逶迤轉  
飽看秋花入越山

五智和倉樓逢丸山松堂新訂高田雅集之約依

石埭韻卽賦

謾笑詩人鬢漸斑風情未老酒杯間秋花最愛野花色  
明日相逢春日山

北越途上

海氣蒼涼積作秋彌山一碧豁吟眸還憐淅淅科江水  
終始隨人向北流

念四日柏崎阿倍樓邀飲席上次小崎藍川懋韻  
戲贈

指點銀瓶倒玉卮嵬峨醉態自清奇攔街豪召彈箏妓  
留客狂催擊鉢詩聯臂踏歌腔未發解襦鄰澤鬢先知  
分攜片刻酣嬉甚好會真成在不期



新瀉松風亭雅齋阪口五峰出示先君舊題因用  
原韻志感

休道前鴻迹漸稀先君零墨未曾微綠楊如夢樓臺換  
碧海生塵斥鹵肥樂事及時鷗鷺社美人依舊芰荷衣  
我來又值秋風起似與尊鱸賦曰歸

又次松野洪洲

篤義

見贈七言韻

蹤迹雲萍遇合緣拍肩同賦小游仙絳河夜灑虹橋月  
滄海秋嘯蜃市煙翠羽明璫蘭燭外玉杯繁露竹枝前  
自從看得盤尊舞願醉斯鄉不計年

又次洪洲五言韻

眺海蒼茫極寒潮落晚汀雙螺堆髻翠初月刷眉青飛  
鳥思孤往流雲且小停松風動琴操側作水仙聽

又次三浦桐陰

宗春

見贈韻

一聲鐵笛海雲空落日相望極浦東爲有鷗呼忘路遠  
雖無人愛覺詩工淺塘柳陌聞漁唱越調巴歛見國風  
多事鯨濤期力掣分明我亦可憐蟲

念五日南邊茶屋鷗鷺會雅集次洪洲詩韻

相思渺渺水雲昏萍約今來獨愴魂一種舟江好風月  
白鷗還護舊沙痕

又一首



紅妝映水藕花清七十二橋涼月生日奪淩波洛神豔  
心憐擁楫越人情女牛私語明河隔賓雁新愁白露橫  
最怕今宵酒醒後笛中楊柳送離聲

是日主客留照以爲記念卽次長澤松雨範男韻并  
紀之

美人如月鏡中天留影風懷左右邊闔席傳觴煩素手  
循環聯句索紅箋儻編水國題襟集長記花樓寫照年  
一別銷魂思擁髻不曾眞箇亦淒然

念六日高田柳絲鄉雅集分韻得支

可可春鬢繫所思妙香峰雪照蛾眉銷魂最是柔鄉酒

黃蘗杯杯萬柳絲酒杯皆畫柳枝

柳絲鄉接五峰詩電知其有謝公東山之興戲和  
柳如錦纜藕如船恍泝青冥風露天君亦乘鸞向明月  
合歡扇上豔神仙

又次韻保阪竹蔭祐吉見贈

輕衫倜儻雅宜秋梁宋還隨高李游河漢乍明烏繞樹  
英雄不見雁過樓登高能賦輸儕輩對酒當歌愧唱酬  
擬縱吹臺懷古飲氣酣半日更淹留

聞君詞賦久研京應執高陽牛耳盟松菊陶家存隱逸  
文章洛社識耆英君屬湖山翁門下拂衣湖海誰同調託契台岑豈



異情便欲相從申闊緒洪鐘容扣寸莛聲

又次韻增村成堂度次見贈

楊柳蕭疏拂畫樓西風枕簟露華流孤鴻歸夢迢迢水  
香草離騷字字秋三國盍簪旬日暇一生蠟屐幾回游  
初筵脫略君休笑有酒如淮爛醉酬

柳絲鄉題壁用松堂詩韻

碧花紅穗悄窺籬似有蟲聲入戶隨玉篋素紈初斂夜  
羅帷明月小圓時神仙好夢違留枕兒女濃情謝畫眉  
襖被淒涼天未曙瓊枝空詠四愁詩

別浦言愁我亦愁晚蕖秋水碧于油來時簾影乍垂地

昨夜笛聲猶隱樓老去風懷任孤負閒將綺事話同游  
十年恨不相攜早此錯何須鑄六州

念七日投輕井澤遠近山莊峭涼侵人戲作用冷  
灰原韻

短褐乍寒零露流畢生無分是瓊樓羽衣相顧月中笑  
坡老不勝高處秋

念八日夢山招飲席上分韻得真

天近秋高風露新月招星喚會羣真浮丘笑指巖山上  
後夜吹笙向玉晨

青萍樞密泉源亭卽事同種竹湘南分亭名爲韻



得泉

客至主方去澗鳴山寂然孤雲蹤乍遠流水意無傳依  
戀尋幽壑遲回惜晚煙何當濯心垢長往鑑清泉

念九日旋京用種竹出門詩韻

出門擬使世緣清應接仍繁山水程甲壑信巖還越嶠  
欲從何處避浮名

花月百回雅集次敬香原韻

青蘋之末覺涼回好共披襟喚酒杯二百十辰風力斂  
中元前夜月華開雲中仙路明銀浦輦下詩盟豔玉臺  
紅粉青山傳誦編子才端的讓君才

龍口看月分韻得咸

晚看漁火隱西巖縹緲精藍龍口銜陰壑長風傳法鼓  
影堂涼月照經函雲開碧落無飛鵲山缺青冥有去帆  
未聽晨鐘先發省夜深衣帶海潮鹹

明星山房中秋雨集和揚鶴原韻

去秋涼雨洗炎埃吟到宵闌絳炬灰此約復尋無月夜  
相逢重醉隔年杯階花爛訝明星吐巖桂幽招隱士來  
賦就不妨天似墨援毫盡擅大山才

虎谿園觀菊次韻

餐英本擬醉千場便覺引杯秋興長有客那妨終日雨



斯花已耐十年霜晚憐隱士柴桑節豔奪仙人姑射妝  
不是攢眉蓮社約虎谿重問古重陽

古重陽前一夕檀欒集次冷灰原韻

擬作風流栗里圖淵明逸興未曾孤酒宜重九之前也  
菊亦羲皇以上乎琴不搗彈猶自韻客難關說豈能誣  
曲肱穩作山中夢何用登高更汎萸

泉源亭觀楓雅集卽興

小築林巒別一鄉悠然眞樂抵濠梁澗泉淨鑑晴峰雪  
楓柏紅分翠麓霜自在逍遙秋暑永主賓物我白雲忘  
沈吟恨奪江淹筆枉費天孫錦七襄

青萍卽和見答因用前韻再賦一首

重涉仙家水石鄉洞天幸未誤津梁碧蘿陰嶺盤盤路  
赤谷西崦樹樹霜無意尋詩偶然得有時隱几嗒焉忘  
興來還展東坡帖天際烏雲寫蔡襄

古曆八月旣望偕石埭種竹湘南冒雨赴佐原菴

輪縑浦

芳

之招其翌汎舟江觀捕鮭而歸後賦

此篇以志顛末

菴郎好事事殊絕當初邀看中秋月中秋有約不得行  
便道筵於旣望設意氣使我難推辭豈知其日雨淒切  
風雨夜歇明登舟去看刀江魚鱗鱗奇哉惟此兩日游



光景多端變倏忽歸來一月不作詩興到偶復從頭說  
刀寧之水西北來南流浩浩旋東折左瀦霞浦溟漲平  
右控縑山澄練闊風帆葉葉鷗翩翩十六蘆灘散秋雪  
儻令乘月泝流光錦袍豪翰會清發何居四客笠展圖  
天陰雨溼泥滑滑卸裝夜火紅橋頭只聽垂楊響騷屑  
咫尺晦昧江聲愁主人一笑襟爲豁二三新知交舊知  
鐙前粲者亦羅列顧思人事百多魔吾生不諧動蹉跌  
卻博一夕尊罍歡庸知大癡非小黠中宵坐客屢大呼  
似有浮雲天遣撥仰瞻虛白微逗漏生憎陰翳更紆鬱  
千萬不意明朝晴蓑郎魚榜霜如抹日出煙消潮水長

蒹葭離坡葉微脫紅妝綠酒載兩頭容與中流艣啣軋  
絲管細細生涼颺筑波纖黛翠明滅漁人操舟如操刀  
砉然沈網橫江截其魚維何非魴鯉非鱖非鯉非鰕鼈  
呼爲鮭魚尺半強爾雅未遑考名物聚網漸急魚倉皇  
挺叉乍逼波拔刺大者奮鬣疑鼓雷小者張口噴飛沫  
斯須垂首不聞聲滿板纍纍如祭獺膾膾魚炙皆從宜  
眞成肥美飽饕餮不數槎頭縮項鱸休論流水桃花鱖  
蓑郎蓑郎觀止矣樂出望外眞快活倚舷長嘯縱拍浮  
湊茲一巧償百拙不見月本無不可即使看月圓已缺  
明年中秋或可期還恐蛟龍改窟穴



雙芝仙館翦燭集席上作

零露叢花蜚亂啼斷時掩抑續時低可憐滿地蕭蕭韻  
似替幽人一一題

愛讀松陵魚具詩蘆花被冷剔燈時西風一夕聞秋雁

夢繞江湖柔艣枝

右和夢山原韻

廣寒回首渺前塵金粟飄來香尙新宛似宮娥悽入道

房櫺雨靜四無人

分韻得真卽以詠桂花

不了詩緣又酒緣素秋文字露娟娟夕陽更愛疏籬影

紅徧君家老少年

次禾原韻

玉池翦燭集卽事

吳楓搖落冷江干取次洞庭波更寒皓月知爲九秋殿

木蕭疏處最宜看

和石埭原韻

冷豔幽芳笑倚籬柴桑居士采餘枝風情休道老逾澹

菊值十三明月時

分韻得支

雙芝仙館觀楓雅集卽興

夕陽紅錦一張雲意匠天公自不羣憑仗遙空過雁影

霜機織字作回文

分韻得文

紅葉一重黃一重夕陽秋見兩般容林霏罨得旋成幕

金翠依稀界澹濃

近來詩句擬涪幡獵獵霜風吹面波應似一軒黃菊盡



野田賸見雀飛多 右和夢山原韻

墜葉蕭蕭浙浙風酒顏纔駐晚楓紅夕陽一段暮愁遠  
詩在山寒江冷中 次石埭韻

十一月念日寒翠莊雅集卽賦

煮茗相期夏木中賞心復此醉看楓秋高山削當前翠  
天晚霜爭最後紅古堠蕭蕭穿竹過新泉汨汨鑿巖通  
舊觀略改詩能健百事知君苦用功

二十四日鸞洲伯巢鴨別墅觀楓醺席上卽次主人原韻

錦帷金谷外綺蘸午橋中直欲平原繡非關晚日烘文

章容易得秋物自然工不用勞吟思楓人一醉紅  
恍在畫樓上絳雲仙所居丹楓空復爾黃菊瘦何如幽  
覓三三徑清鳴泱泱渠誰能扶翠袖修竹暮相於

玉山樵草堂雅集歌 并引

清國董綬經 獲古本草堂雅集將刊行問世徵其  
題辭卽作此歌

道園不作淵穎亡元氣日劉哀而傷可憐鐵笛以後調  
繫在玉山之草堂大都宮闕已摧鳳高麗美人罷進貢  
龍狩空沈絕漠沙花游誰作嬉春夢洛陽走馬已矣哉  
僧帽道鞋歸去來何當死葬金粟冢或勝狂飲金蓮杯



雅集豈無賞心事中藏  
衰世無限淚西臺應繼  
臯羽音中州并效遺山  
意蠹簡蕪沒五百年伊  
余願親嗟無緣不意草  
堂草千里今日合璧心  
怡然

來青閣小集分韻得歌謾道所思

黃金往往氣消磨奈此  
菊枝憔悴何爭及蠟梅  
花影小歲寒時節傲霜  
多

花月會席上和敬香原韻

開尊輒覺興邁飛獨立  
蒼茫對晚暉巖穴誰持  
門戶異培壇本合輔車  
依霜乾陂澤鴻猶集禾  
熟田倉雀不饑且喜太  
平還有象莫教歌詠歎  
風微

至日佐藤謙堂招飲席上分韻得灰

窮景崢嶸酒一杯登筵  
偏覺曠懷開艣聲遙浦  
隨鳴雁日影陽岡欲放  
梅樓帶屨煙環島嶼詩  
含神霧緯蓬萊有人小  
揖芙蓉雪返權滄洲去  
復回

雙芝仙館臘尾翦燭集分韻得刪

素梅笑立峭寒間儘有  
詩愁猶未刪小閣鑪煙  
春已裊篆絲曲曲繞屏  
山

又和夢山原韻

高人歲晚醉低回別樣  
情懷付酒杯栗里孤山  
一瓶裏并收霜菊與冰  
梅



心字私燒一瓣香騎驢并憶孟襄陽笑吾猶少詩人骨  
未抵清癯未抵狂



249


53



槐南集

247  
35







槐南集卷二十六

東京 森大來 公泰

丁未

開春初八日澹如水廬雅集即用敬香原韻以道  
吾情

春服襲襲入坐來辛盤未撤綠尊開稱心且了開年約  
到手頻傾蘸甲杯聖處可求惟旨酒平時無用是奇才  
已拚一醉過人日從此南窗臥看梅

二月青山新居偶述兼以紀恩

平生分未有吾廬騎盡京華卅載驢庾信本工蕭瑟賦



揚雄惟儻寂寥居春回金鵲觚棧近雲暖香鑪畫省餘  
昨日承恩眞異數依然蓬華坐看書

阪口五峰招飲八百松樓卽景口占

冶春裙屐愜招要上有雙峰黛澹描少女風來塵自輓  
晚梅花落柳初嬌桃根家隔蘆芽渚鴨背船通雁齒橋  
忽憶舟江眉月夜謳鴉柔艣趁歸潮

三月檀欒例集次冷灰原韻

雨餘門巷履綦侵拾翠天寒又薄陰鏡檻呵毫畫眉墨  
錦囊斂手繡鴛鍼桃花水長冰猶滿燕子泥融雪乍深  
何日香輪邀俊侶晴窗寸碧敞遙岑

清明前五日雙芝仙館翦燭雅集分韻得歌此日  
春寒尙峭卽以紀實

花事天寒如夢過桃樵杏悴奈春何禁城凍雨瀟瀟極  
縱有梅殘亦不多

又和夢山原韻

寒食東風寒更催篆煙茗火兩成灰那堪杏白錫香日  
卻被簫聲吹雪來

彷彿鄰槽醉酒聲夜來聽雨到天明且貪淺醉深眠好  
夢向杏花春店行

花月會席上次敬香韻



尋詩出茅屋路曲柳陰陰衆草綠如積一花紅乍深鶯  
簧猶韻玉蝶羽已銷金聞言春欲盡綵纒佇中林

來青閣翦燭集席上雜詩

綠陰門巷罨成幃樹罅夕陽紅乍微知道名園花事了  
一聲鷓鴣餞春飛

春餘幽事正無涯棠棣出牆繁有花不用金鈴相護惜

一重新綠一重紗

右和禾原韻

路自青山南麓斜杖藜芳草綠逾加回頭還爲思詩立  
數到殘櫻葉底花

休嗟春物不多時也似才人遲暮詩萬綠陰成心未死

一風苦向棟花吹

右和夢山原韻

吳船十載記魂銷誰使淞花付寂寥好把羣芳當日譜  
月明今夜并修簫

分韻得蕭

隨鷗吟社第三次大會和湘南原韻

賭唱黃河奪錦袍盛唐本事讓今豪水邊人聚三春麗  
日下樓凭百尺高芍藥瓊琚新鄭衛蕙蘭蝴蝶小莊騷  
詩天如海波瀾闊欲起江湖滿地濤

銚港曉雞館卽事

展拓心胸萬象兼凌晨晞髮亂礁尖氣呵蛟蜃成宮闕  
影攝乾坤納鏡匳海客沙鷗忘浪險酒船漁網趁風恬



浮生終合斯中寄一宿何妨暫滯淹

又醉後口占

扁舟信宿狎鳧鷖此樂煙波渺渺兮載酒春風鮑子海  
膾鮮一飽下金齏

五月檀欒例集次冷灰原韻偶聞冷灰將有滿遼  
之行故詩中及之

干戈戢後野煙生郭有人煙河有檉澆酒胸中新感慨  
勸君豈復渭城聲

昨日沙場鬼尙新行人指點訝非真可憐化作無名草  
一碧萋萋空值春

絕險金湯謾恃天庸知旱地不生蓮古今容易陵成谷  
無待詩人變雅篇

塞上榴花血色春行行詩思不應貧鄂羅館外聞啼字  
又恐瘡痍滿眼新

鐵戟淘沙海倒流沈沈哀壑尙藏舟刀兵鑄出滿洲路  
一錯何人銷甲兜

雙芝仙館翦燭集席上作

豆莢初成竹筍殘菖蒲亦已徧江干意行欲把生衣試  
梔子花開又晚寒

爾雅陳篇近日親蟲魚草木看偏新蜀薑吳膾知風味



任是身非磊落人

右次夢山原韻

忘憂物亦綠盈尊人是虛心笑不言解識杜陵詩句妙

堂前生竹後生萱

分韻得元

春去江鄉事事憐綠楊如畫有新蟬茶籃酒榼誰攜我

七尺烏篷破水煙

次石埭原韻

玉池翦燭集分韻得庚卽賦贈王彞園阮舜琴

丙辰

二老

翦韭相迎翦燭明當檐鈴語自關情誰人得似王摩詰

畫到詩龕夜雨聲

刻燭分箋互唱賡最忻把臂得新盟雨聲也似鄰槽壓

勸酒江東阮步兵

寒翠莊醺集和夢舟原韻

徜徉林壑謝紛譁簪盍襟題發興賒罨屋綠陰梅子雨  
熏人朱夏石榴花蕙潭乍動緣垂釣竹庵微香爲煮茶  
提挈年年愜心賞羨君幽事是生涯

雙芝仙館翦燭集碧荷勸酒分韻得冬卽興

青荷傾盡酒千鍾直是五湖游可從西子鬧紅秋一舸  
鏡中相倚醉芙蓉

又和夢山原韻

一例深杯到手頻醉將新語付佳人自從初翦君家燭



二十年來迹未陳

四敞軒窗面面風居然山館小玲瓏晚來雨驟如歌吹  
身在揚州畫舫中

又補和前日玉池之席見示原韻

電燭煌煌不用然神光離合暎華筵銀屏一閃芙蓉影  
照到紅妝倍可憐

苔篆煙絲一樣青冥濛做雨韻幽局微螢冉冉先秋意  
去上鉤闌汲井瓶

忽憶湘南煙景微忘機垂釣著蓑衣何當同坐漁磯雨  
萬柳陰濃白鷺飛

又用足清娛軒唱和詩韻

斜行醉壁寫新歌越女門頭一笑過明日怕尋尋句夢

練裙依舊索書多

戲石堞

綺語推君老作家濃於酒味嫵於茶豆爲南國相思種  
荷是西天稱意花

贈夢山

明星山房觀月醺集和揚鶴原韻時揚鶴將有雲  
南之行詩中故云

明發驪駒嘶道周肯將良夜付悠悠蒼山洱水先縈夢  
桂陌蟾宮暗惜秋畫扇仍圓歌妓榭彩觴常照酒人樓  
此情萬里應無異爲驗瀾滄沂月舟



問種竹病誦其枕上作淒然動懷卽依韻賦似  
鍼膏誰與破沈陰藥氣房櫺掩靄深造化小兒眞作劇  
神農本草欲搜尋青衣倦恐屏風觸白露涼防枕簟侵  
臥聽長安秋擣練柴門明月隔前林

十月一日送種竹樞到日暮里次韻其病牀絕筆  
詩述哀

九秋知己逝四海一悲涼此日方扶櫬其人宛竟牀宅  
空庭草積墟冷野煙長送到茶毗所蒼茫意倍傷

衢歌巷祝四章

儲皇十月駕樓船適發西巡海日鮮甲觀應開平壤野

龍樓直築漢山巔

千里慶雷萬里晴銀濤練甲照寰瀛素尊神后齊含笑  
箕子檀君抃奉迎

句麗百濟瞻重曜渤海新羅拜少陽剖判以來眞罕觀  
皇天日嗣涉遐荒

載道臚驩閔普天三韓父老識旌旆菊花黃是興朝色  
金尺山河越可憐

三谷耕雲青山新居告成招飲酒間分得波字

蔣家三徑闢幽蘿喜我青山相識多古道相交皆管鮑  
新詩遣和有羊何興來側帽黃花笑觴至開顏綠酒醅



不覺一尊明月滿手中穆穆引金波

聽秋閣翦燭集和夢山原韻

敞亭爽隄俯巖幽小爲簑松絃月留下視人間夜寥聞  
乘風載響一天秋

法鼓松門夕照遲不關側帽者爲誰意行采采從流水  
鬼母祠前早菊時

又分韻得陽

桂巖月落夜蒼蒼澗戶吟蟲欲入牀且燕詩人刻餘燭  
芙蓉葉上看初霜

寒翠莊雅集和夢舟原韻

觀盡游魚觀盡棊閒來又趁晚楓期藤蘿翠奪經霜後  
林壑紅酣欲雨時谷口竿招垂釣隱洞門石識牧羊兒  
相邀一笑煩襟滌鳴玉寒流瀉碧池

種竹山人追薦之筵分韻得蕭昔柳屯田葬仙人  
掌游人士女每逢清明上冢之節攜酒澆墓名曰  
弔柳會請按此例從今謂此會爲弔竹則爲東台  
又增一故事矣

當年柳墓酒杯澆故事相追魂可招并得曉風殘月恨  
鶯亭秋弔竹蕭蕭

晚看黃葉自然吟社例集  
席上分韻得冬



意行黃葉白雲峰秋老風光不貴濃千載茶山老詩客  
夕陽歸去會相逢

十二月初七自然吟社鶯亭例集揭野望及即興  
爲題分韻得微亭有南海康梁二人留題因有所  
感觸賦之

登高極目澹斜暉霜氣淒侵客子衣楚國狂生歌鳳去  
魯門大鳥避風飛寸心耿耿千秋在窮景怱怱百事違  
東海無邊連野望蒼茫積水欲誰依

戊申

社頭松

上日  
試筆

何年辭夏后得地傍靈垠豈不思梁棟因之免斧斤神  
飆回禁禦清瑟響郊殷祀罷春榮動蒼官亦向欣

寒蕪

來青閣消寒第  
一集席上分韻

極目平原遠薺分霜風淒緊日西曛投空翻鶻低黏地  
傍水行人暝入雲碣石懷開杜工部廣陵腸斷鮑參軍  
登臨不盡蒼茫意麋鹿臺丘賸作羣

來青閣席上分韻口占

桂玉長安久索居俸錢近日欲無餘何時穩卜青山宅  
飽買名花飽買書

石川柳城

戈足

將游清國南邊次其留別詩韻贈行



四海皆知石柳城郭熙能事擅名聲雅將風月爲襟抱  
始信丹青亦性情茗雪浪恬隨緩權秣陵天遠入回程  
行裝無限滄洲趣先此臨岐一掃橫

柳城作墨江話別園  
求諸家題詠故云

湖亭早春

自然吟社例集  
席上分韻得蕭

鶯怯餘寒舌未調早攜斗酒換裘貂玉壺山浸彎環水  
鏡檻人行宛轉橋春色乍回隨展齒草香微動趁裙腰  
湖梅休道開差晚已有垂垂一樹招

來青閣消寒第二集賞盆栽鄧尉梅同用王漁洋

雨花橋觀花韻

鄧尉山中梅曾識六朝寺雨花橋上人冷吟踏冥翠云

是王新城神韻謝姿媚高風二百年復此有君至徒倚  
眄花態橫斜翫花意移根益盆中託諸驛陞次蕭齋彌  
暗香小亦一天地坐我玄墓南聞鐘生緬思

又分漁洋鄧尉竹枝韻同賦

白石道人詞抱開夜梅吹笛雪還來依稀記得垂虹路  
小小春篷載酒回

自然吟社例集席上賦鶯亭老梅

杜陵天寶游春日黃四娘家試一題萬古風情應不減  
嬌鶯故傍老梅啼

謝蕪村遺愛紫雲瓢詩紹春公子囑題



十七字詞風格存高人誰似謝蕪村一瓢之樂兼賢聖  
花月千秋貯醉魂

公子華筵酒半醺玉山已倒杜司勳兩行紅粉胡盧笑  
可發狂言乞紫雲

隨鷗吟社大會和土居香國原韻并以志感

羅綺櫻花媚碧流曾無一處是閒樓桃根古渡梅根冶  
荷葉深杯竹葉舟風月前蹤追後水煙波同調付羣鷗  
人才遞嬗春長在存歿何須悵曩游

又一首次韻志臆

烏帽黃塵往復回所思不見賸丘臺百年惟有扁舟好

春水白鷗依舊來

雨中看櫻卽景

自然吟社例集  
席上分韻得文

滑滑流鶯靜裏聞草如茵處絕塵紛花容醞藉終朝雨  
畫筆空濛一轆雲白雪不妨歌寡和青山也似酒微醺  
儻能此景留三日願護金鈴到夜分

來青閣雅集以新陰命題率賦七律一章亦卽予  
近日昕夕所目觀之實景云爾

禁苑穠華看漸虛鶯聲燕影乍稀疏纔經一雨春光盡  
便是千章夏木初清拂熏風生殿角滋隨幽草上簾裾  
退朝憩息宮牆外紅隱櫻桃四五餘



綠陰看基

自然吟社例集  
席上分韻得尤

四無人語綠陰稠  
清簟支頤看奕秋  
破寂鳥驚基子響  
含桃一顆墜枰楸

梅天即事

同前分  
韻得微

宿雨彌亭午旋晴  
未落暉琴絲容易潤  
茗靄自然霏  
題字蒲葵扇聞香荷  
芰衣欲成池閣眺  
晚翠復依微

安廣龍峰

件

招飲函山臨谿閣即興

翠微兩日與提壺  
好友招尋好鳥呼  
溫水盈槽清鑑髮  
美人通體白凝酥  
幽崖篠密螢開闔  
靜夜谿喧雨有無  
曉起濃嵐浮檻角  
且忻醉眼不模糊

北窗

自然吟社例集  
席上分韻得鹽

山閣蓮花報漏籤  
遠公社裏酒人添  
不衫不履羲黃上  
跛脚胡牀入黑甜

寒翠莊銷夏清集次夢舟原韻

滿庭溼翠鳥呼晴  
老壁蝸痕猶半明  
點筆石滋桐葉雨  
煮茶煙聚豆花棚  
白來瀑布千尋挂  
倒卷風漪八尺生  
卻遣詩人常願夏  
笛牀偃臥聽涼聲

七月二十九日青萍子爵芝城山館納涼雅齋席

上率賦七律一章贈韓國金雲養中樞

允植

樞庭華髮望崇隆  
奕葉芸香冽水東  
清燕寶文窺典冊